

名

山

藏

名山藏卷之

晉江何喬遠

臣林記

洪武臣一

徐達

常遇春

鄧愈

湯和

大將軍達者姓徐世田夫也至達而有志高帝在
滁陽王館中達年二十二杖劍往從與語悅之言王
以爲鎮撫滁陽王之執孫德崖也德崖軍質高帝甚
急達挺身代質已從渡江下采石定太平取二溧高
帝擊元將陳也先蠻子海牙於太平達與鄧愈湯和
戰襄城橋擒之當是之時諸人未有定屬無不人人

欲爲君者達訪勇仕諸人上獨奉高帝謹高帝亦察
諸人亡如旣入建康爲吳國公命領諸將取鎮江一
日克之授鎮江翼元帥府統軍大元帥公置江南行
樞密院以達同僉院事率諸將圍周士誠之常鹵張
士德於甘露周益園牛塘與常遇春胡大海夾擊破
之進困常克之遷僉院從攻元寧國執其將亮祖繇
別道下常熟轉與邵榮廖永安攻周宜興使丁德興
絕太湖口而力疾戰拔之公征婺使守建康達使俞
通海擊敗漢將趙普勝於水寨以復池州遷奉國上
將軍公還婺使與張德勝攻漢安慶捷今浮山青山

亮潛與常遇春拔漢水軍伏九華山大勝漢宜興陷
於周旬日復之遷江南行中書右丞從擊走漢友諒
來攻建康軍從征漢江州友諒遁武昌公使扼漢陽
沌口下豫章討平降將祝宗康泰之內變以前部從
擊破周壽春轉攻左君弼廬州戰間以萬弩縱擊君
弼劫營之兵君弼歛入城圍之聞漢友諒大寇豫章
罷圍從援逆戰彭蠡湖身先諸將敗其巨艘死其千
五百人還守建康吳公諸將惟達常遇春名善戰也
然遇春獨坐風掃電掣爲上勇達謀勇兼資亡踰也
達有所策公輒善公欲有所行諸將間未可達先奉

命雖在軍必內請公悅其恭公爲吳王以達爲相國漢平達卒廬園克之徇下漢故荆湖諸郡江陵夷陵張士誠改周爲吳達與常遇春攻吳淮東克海安及泰高郵還捍宜興進克淮陰復攻安豐以大將軍入吳東戰吳皂林之野生致吳兵六萬不戮一人與諸將進圍吳姑蘇軍封門困之三百餘日縛吳王士誠收兵二十五萬封其府庫財寶無取焉與遇春先期令士腰繫令掠財折居離營三十里者皆死城破達軍左遇春軍右無敢犯秋毫師還召見戟門封信國公吳元年也其冬爲征虜大將軍帥諸將北取元克

沂嶧青益東平萊濟寧兗濟南吳王爲皇帝改元洪武加銀青榮祿大夫上柱國錄軍國事中書右丞相信國公兼太子少傅其春取東昌進取樂安棣引兵取汴梁與元將詹同脫因帖木兒戰洛北常遇春單弓入陣達麾指揮任亮康茂才耿炳文乘之脫因帖木兒奔陝進軍郭北趙庸曹良臣亦自虎牢關破詹同衆五萬與達會乘勝下洛陽進克陝元李思齊張思道退守潼關使馮勝拔之東渡河檄諸將以益都徐濟兵會東昌使薛顯俞通源取衛輝彰德廣平顧時浚水閘引舟與傅友德會克臨清以步兵克德州

趣諸將兵繇東昌會德進克長蘆至直沽梁元舟以
濟常遇春與諸將並河東西步騎陸而前逼海口元
丞相也速不戰潰進破其兩平章擒將校三百馬百
匹糧二千六百石進軍通塹諸門指揮郭英大克之
擒元宗室一人埋燕濠而登元大都之門戮元監國
王子大臣不服者獲諸王子六人玉印二玉璽一是
役也封元府庫圖寶兵諸元官護其妃嬪宮人一無
所取如克吳時於是留兵三萬與孫興祖華雲龍守
北平而自與常遇春馮宗異率兵之太原夜劫擴廓
帖木兒營克之命友德顯擊破賀宗哲於石州定崞

恆霍絳猗氏平陽是時李思齊據鳳翔張思道據鹿臺以衛奉元傅友德攻破之思道西走涇陽達使康茂才郭子興扼潼關引大軍發太原還平陽次河中遣張良造浮梁選士馬以從常遇春馮宗異渡河趨陝達自繼其後入之遇春宗異進取李思齊鳳翔思齊奔臨洮遂入長安以耿炳文鎮之進克隴秦鞏昌遣馮宗異直趨臨洮思齊不戰降思道之弟良臣守慶陽亦降既復叛趨至涇與馮宗異湯和等圍慶陽敗良臣斬之陝西悉平班師還京洪武二年也其冬高帝大賞諸將賜達白金五百兩文幣五十表裏三

年以爲征虜大將軍窮追元保保大破之定西與馮
勝傅友德李思齊自徽州南出一百八渡至畧陽擒
夏將琳遂入汙遣裨將金興旺張龍繇鳳翔入連雲
棧取夏興元使鄧愈西平吐蕃征哨極西北初達之
下元大都也常遇春請窮追之達不從遇春怒曰大
將軍不可測也及元君已之達曰非君所知夫元君
今雖胡虜匹夫也而昔君陛下卽執以歸陛下何以
治之天命已在陛下矣達病帝微行其家達上床頭
劍曰他人得相加遺也帝悅旣營正宮以其舊內賜
達達謝不敢一日故醉達掖寢之覺問左右曰安寢

曰寢舊內達攝衣起惶恐下階拜呼死罪趨出帝益
悅於是爲達治第榜其坊曰大功與之棹楔二第胎
髡帝過之曰可矣達遂不敢卒髡帝益悅車駕時臨
幸呼大哥達妻嫂夫人云是冬大封功臣進魏國公
四年練兵繕塞北平山西以便宜徙山後順寧等處
戶三萬三千八百口一十九萬七千餘籍爲軍民予
田給廩置屯田墾田其冬召還明年上欲窮追元太
子卒擒王保保取歷代傳國璽於胡中命以大將軍
還征虜予十五萬騎出中路李文忠爲左副將軍出
東路馮勝爲征西將軍出西路各五萬騎都督藍玉

爲大將軍前鋒敗虜野馬川復敗王保保於土刺河
王保保遁與賀宗哲合而拒我師嶺北時師數發砲
戰不利死者萬餘人偏將軍湯和遇他虜斷頭山亦
敗左副將軍出塞至口溫雖稍利道遠乏水其後軍
爲虜所掩失徹侯曹良臣大校數人然得其士馬輜
重畧等征西將軍與副將軍友德至西涼屢破虜盡
收其妻子坐私匿馬駝賞不行上竟不問達失軍也
自是歲填北平歲盡返之賜休沐以時燕見而達益
恭達長女得尚燕王每見執臣禮無敢居舅六年獲
故元官屬千三百餘人招致河曲府山谷軍民二千

餘戶十四年故元平章乃兒不花寇永平指揮劉慶
死焉命與湯和傅友德往討既至脩永平界嶺三十
二關使友德克虜灰山寨外十七年太陰數犯上將
上憂之會達背發疽少愈上使達子允恭往視賜之
璽書而召之還達還其明年疾甚高帝四召名醫禱
于山川社稷城隍願全之數載它日與之同歸竟不
起高帝號踊奔慟翼日輟朝愴然語羣臣贈中山王
諡武寧賜葬鍾山陰手功墓道且曰婦女無所愛財
寶無所取忠志無疵昭明乎日月惟大將軍自大將
軍薨高帝所受大將印獨宋國公勝涼國公玉而穎

川侯友德以功進封公其受賑亦數然待之皆不能
如大將軍高帝所飭厲數稱中山或益稱中山開平
二王而燕王卽皇帝位舉中山王以勵將臣戚屬者
不一一王言簡慮精與人無戲沉毅剛決今出不二
其撫士不飽不食不營止不就幄傷病身問之與醫
藥死者哭而槨棺焉得壯士若謀輒結以恩意皆爲
用高帝取天下計初下建康再戰友諒身在行其他
什九中山王中山王所平大都二會省三望郡縣邑
以百數歸朝上符印垂橐還第平生無聲酒伎勝之
好親禮儒生囊書自隨講說禮義剗剗如也始高帝

預建功臣廟雞籠山定配享太廟皆中山王位第一
及中山王薨之七年謂王止其身未盡所以報元功
與岐陽皆封三代如開平王而諸功臣用爲故事王
有子女各四人子曰輝祖添福增壽膺緒四女一爲
仁孝皇后一爲代王妃一爲安王妃添福早卒輝祖
初名允恭起家勲衛署理左軍都督府事王薨之踰
歲賜是名襲公數遣北平山東河南練兵治餉還領
中軍都府建文帝卽位泄燕謀於朝爲建文帝所親
進兼太子太傅燕王卽位弗迎附下獄五年死名記
於外記其年成祖以中山王功及仁孝皇后故襲其

子欽欽復乞守輝墓成祖怒削爵徙鳳陽仁宗卽位復之尋卒子顯宗嗣嗣二十三年卒無子弟承宗嗣婁領軍府提督南京守備加太子太傅廉公恤士而酷於用刑嗣十六年卒子備嗣凡再督南京守備持重善爲容加太子太傅嗣五十二年卒贈太傅孫鵬舉嗣爲人溫厚長者凡三領軍府督守備加太子太保晚節嬖其妾奏立爲夫人欲嫡其子不許許立其庶長子邦瑞鵬舉嗣公五十二年卒邦瑞嗣督守備尋以病辭自顯宗嗣而高帝孝陵在留京者以懿戚世世奉祀增壽以父任三遷至右軍左都督侍宿衛

則時時輸情於燕燕師起數從增壽訶虛實師將入
增壽謀爲應建文帝斷增壽腰燕王卽位追封武陽
侯再封定國公俾子景昌嗣久之領軍府嗣凡三十
五年卒子顯忠嗣十二年卒子永寧幼又七年而嗣
疾失心予半祿罷朝請病二十六年卒子光祚嗣久
之領軍府以東宮舊恩超進太傅旋以監脩武睿二
朝實錄累加太師兼太子太師凡四十五年卒子延
德嗣領軍府四十餘年卒子文璧嗣領軍府加太保
太子太傅嘉靖中詔裁恩澤世封有言定公功不稱
者卒自如膺緒初爲尚寶卿繼爲大同護衛世襲指

揮僉事以中軍都督僉事奉朝請成祖朝輝祖增壽
皆前卒仁宗爲皇太子以舅故尊禮之及卽位授膺
緒子景珩中軍都督僉事景璿金吾前衛指揮僉事
膺緒爲人實心爲質明興天下凡五公中山王家居
二焉始成祖卽位用中牢告中山王其後皇帝卽位
皆以爲故事

副將軍常遇春世農夫也勇絕人少從羣盜劉聚甚
見愛任遇春察聚僅盜行而高帝威名日有聞與壯
士數十人棄之來歸未至卧田間夢神人甲而楯趨
之曰起起主君來寤高帝騎過之與數十人求附順

之請爲前鋒在諸將中以敢戰聞高皇帝所繫
僵漢混一天下獨遇春與大將軍達居多遇春出戰
每積鈔列櫓矢石交下諸將恆憚莫前遇春單身獨
手陵蹈其間敵人聞遇春名咸狂魄降北其初從渡
江抵采石元陳兵磯上磯下巨舟如織莫敢先登遇
春映舸前之挺戈而躍元將皆跣藉拔之從擊呂珍
安豐戰將合死之三角三勝其後與元戰洛北陣旣
成單騎決衝元以二十騎攢槊刺遇春無所中遇春
一矢正貫其先驅大哮殺入大敗元人凡遇春所以
克捷多此類也惟高皇帝亦戒遇春輕遇春自言予

我十萬衆橫行天下矣遇春先戰恒御女子數人戰歸解甲血糊模罕罕有聲所過師恣士掠士皆騰羸庶霍健於諸將士至從大將軍則輒遵守大將軍約束也其始起捷於池州生擒三千盡戮之帝爲不懌及克贛諭降嶺以南兵不血刃乃大喜累授中書平章錄軍國重事加封鄂國公既卽位加銀青榮祿大夫上柱國兼太子太保與大將軍取陝西其明年率李文忠追擊元主於開平敗故元將江文清錦川進敗故元丞相也速全寧進擒其丞相脫火赤大興兵至開平元主復遁追逐數百里俘斬其宗王平章數

人還次柳河川卒帝悲悼罷朝曰徐常二將軍報我
至誠常今已矣使我如失手足時功臣初卒未有定
儀上命禮部議天子爲大臣發喪禮如宋太宗爲韓
王普舉哀故事已詔贈翊運推誠宣武靖遠功臣開
府儀同三司上柱國太保中書右丞相追封開平王
諡忠武復推恩王三世柩至龍江車駕臨祭之其文
曰胡元季世天下大亂生民危墊未知所底朕奮起
臨濠屯師和陽乙未之春爾來依我同渡大江先拔
采石旋平太建江東之地次第順軌自是以來馬汗
益馳橐弓未橐南破三衢西圍金斗戰漢鄱九間射

殞友諒攻圍武昌降其子理以平湖湘南尅贛撫雄
安北定襄陽旋旂淮東奄秦及徐收浙舉吳執其王
歸長淮東西大江南北爾功赫焉丁未之冬副爾大
將北征中原首下齊魯既攬河洛隨戢幽趙遂包晉
冀轉清秦隴衝舉折格帶邑連城近者北平有警復
令將軍與偏將軍稜威首路轉戰永大以底開平朕
全有中國上軼古初爾功赫焉天下克一方有膚酬
何圖未諧遽爾畢命哀痛切心與誰言哉祭畢慟哭
還命擇地鍾山陰塋之百凡葬具皆出於官與之田
器九十如其色金二鼓二紅旗二拂于二紅羅蓋一

鞍籠一弓二箭三竈一釜一火爐一錫造黃金塗水
確一甲一頭盔一臺盞一杓一壺瓶一酒甕一唾壺
一水盆一香爐一燭臺二香合一香匙一香筋二香
匙筋瓶一茶鐘一茶盞一筋二匙一匙筋瓶一椀二
椀十二橐二木造班劍一牙仗一木造黃金塗立瓜
二骨朵二戟二響節二交椅一脚踏一馬軌一韃馬
六鎗一劍一斧一弩一食棹一床一屏風一柱杖箱
一交床一櫬二香卓一木偶人二尺樂工十六人執
儀仗二十四人控士六人女使十人朱雀玄武青龍
白虎神四門神二武士十嬖六壁一篋筭拋禪衿盤

各一苞一筭三糧漿瓶二油瓶一紗厨一暖帳一束
帛青三段纁二段長丈八尺召宋濂曰朕東朝高麗
西內土蕃北卻沙漠南來交占開拓之勲遇春十居
八其撰神道碑表遇春墓三年封子茂鄭國公次子
昇開國公長女許爲皇太子妃六年廟中立府旣成
祭之曰思爾相從於今二十一年爾之去世倏經五
載觀聽容聲十有七年而已東征西伐櫛風沐雨朕
知爾勞英風冠世海內知名真丈夫也今夏驗功中
都公侯相從羣然護駕行失爾隊列亡爾班朕心惻
爾因祠在斯享爾如生爾之昔友皆隨來奠鄭國公

茂從其婦翁馮勝征納哈出縛納哈出於座歸而交
訟於天子天子罷勝朝請安置茂龍州語在馮勝記
靖難兵至開國公與魏國公力戰浦子口成祖卽位
釋之開國公子繼祖坐事謫雲南爵絕弘治六年錄
其玄孫復錦衣指揮嘉靖十年封其八世孫振懷遠
侯其世別見於勲封予見開平王像黑而偉臂有脩
毫其狀如猿亦曰猿臂以金珥珥耳蓋少沿元俗云
王有再從弟榮從軍有功以指揮同知從李文忠出
廣昌與虜戰沒

郎曰大將軍謀勇無資雖勞不伐夙夜匪懈以功名

終所以處草昧君臣間微已天下甫平副將軍不及
論功與共享之跡其當時皆一心歸誠皦然而無間
非徒用勇力冠軍人以太祖之興比漢高帝然曹平
陽未必盡平天下韓淮陰善戰而不善居之未有如
兩將軍者也

鄧愈虹人魁偉有力元亂父順興與其鄉人起臨濠
戰死愈兄領其衆未幾亦死愈年十六衆推爲帥常
挺身摧堅衆皆喜曰早得仲帥乃公何至亡居二年
歲乙未率所部自盱眙歸太祖滁陽授軍總管從渡
大江克采石太平與徐達以奇兵破陳也先從定金

陵復二溧破鎮江陞元帥守廣德出擊元長鎗元帥
俘其總管世榮若軍士千餘人丁酉移戍宣州取徽
敗元八元帥遷行樞密院判守之其冬與胡大海謝
成破元苗帥楊完者兵十萬生擒其部將辛等降婺
源帥同戊戌擊破元鉄木兒不花元帥寨斬首爲多
與部將弼虎茂先婺源降帥同追至婺源東門殺之
獲其卒轉下淳安敗賊帥于貞降其頭目軍士遂有
建德拒却楊完者殺其將李副樞降其苗兵陞同僉
行樞密院事再擊完者兵烏龍嶺轉僉書行樞密院
事己亥徇臨安破張士誠閒林庚子于光余椿擊走

漢將辛同知以饒附太祖使愈鎮饒與漢相距屢破其水軍辛丑除江浙行省叅政兼僉行樞密院總制各翼軍馬左丞吳宏等皆自拔歸附遂襲浮梁取樂平悉定饒境內進取江西屯臨川索起臨川人熊鼎致帳中與論事一軍驚懼主將得師撫州將克明詐獻地以緩兵鼎爲愈畫計夜馳二百里入之克明度不免則來歸西人牛酒郊勞太祖下漢丞相胡廷瑞平章祝宗同僉康泰於南昌愈以步兵來會授江西行省叅知政事亡何宗泰從徐達攻武昌中道叛倉卒反入南昌城愈從數十騎戰且走踣而跨四馬奪

撫州門奔歸太祖太祖不罪也達攻復南昌太祖以
兄子文正爲大都督開府其地復使愈爲副癸卯漢
圍南昌攻撫州門愈與諸將殊死戰相持者三月甲
辰破新淦賊清於永豐其秋與常遇春平臨江諸寨
圍贛降贛將天瑞南安雄韶皆款還軍吉安討饒鼎
臣安福士掠安福州判官潘樞入謁曰將軍奉揚天
威首亂未除良民先掠甚失弔伐之義愈大驚謝熊
宇伯穎吳元年爲起居注上精求禮樂之事嘗召翰
林學士朱升等陳樂器於庭上擊磬命升辨五音升
對作音上大怒欲寘之法問從容論解上曰升每謂
審音顧不辨官徵耶問對曰石音難辨自古而然唐
虞雅后夔能和磨聲書曰於予擊石拊石百獸率舞
上曰任此豎儒治樂樂何緣和問具言樂之和衆人

所致人君能致中和則萬民和萬民和而音樂和矣
上怒乃解升既出謝曰非能君吾屬幾殆上嘗字鼎
不名一日以弓矢授鼎射鼎一發中鵠上喜曰
以賜明日又射召至榻前俯身御弓矢爲射容以激
鼎鼎跪受弓左執之右手掬一矢執二矢向鵠三發
連三中上嘉勞久之後爲晉秦二王相最後爲凌寧
衛經歷爲梁兒只叛兵所害
思以才自見朝夕芒角撐觸心胸間不吐出不已安
福州歸職方有薦樞於上者召見奇之以爲州判官
署州事方自愈時辭氣激烈持製之士或怒視於傍
樞神色自如愈欣然曰微爾言吾不能知也卽下今
日敢有囚吾民者斬民爭傳趨樞樞真空舍戒勿出
自坐舍外日設渾糜食之女婦稍艷者令以塵土泥
面一州之人侍以無恐已湯和統大兵壓境樞走轅
門獻計和納之秋毫無犯軍卒過安福
者其城曰此中有健吏不可犯也
還討蔣鬼頭

砦賊進江西右丞加湖廣行省平章鎮襄陽吳元年
秩左御史大夫太祖卽位加兼太子左諭德拜征戎

將軍經畧中原使王成廷琛孫茂先分道下唐南陽
生擒元蔡國公克新等轉克隨降右丞誠隆進取南
陽諸賊寨斬關省入殺其巨魁定葉舞陽曾山遣攻
取洪山寨獲蜀河莽張定金商鈞房三年拜征虜左
副將軍從徐達平隴右大敗元保保定西降河州土
蕃諸酋河以西朶甘烏斯藏諸部封衛國公叅軍國
事賜券曰江海之淵神龍居焉波濤洶湧莫測淺深
以故神龍得運用其間出雨興雲代天澤物龍雖云
神淵資之也朕起車萊與羣雄並驅獨居江左周廻
勅敵爾愈從朕戰勝之守山越鎮襄陽敵莫敢犯爾

智如淵及其號令三軍威若洪濤是以守護邦畿人
何知我所爲我得匡論籌謀遂成帝業天下已定朕
無以報加爾爵祿使爾子孫世世承襲朕本踈愚皆
遵前代哲王之典茲與爾誓謀逆不宥若犯死罪爾
免二死子免一死以報爾功五年拜征南將軍與周
德興吳良討古澧諸蠻六年備山西北平二邊九年
拜征西將軍討蕃部川藏與副將軍英三其兵追至
崑崙山俘斬無算副將軍英得封西平侯上加愈功
自河州召還道卒年三十餘追封寧河王謚武順
至三山車駕臨奠視其塋處配享太廟肖功臣像祀

之子鎮及銘皆以從征卒銘子源亦有征胡功永樂
初拜散騎舍人其後爵中絕弘治中錄愈五世孫炳
錦衣指揮嘉靖中封其六世孫繼坤定遠侯其世別
見於勲封愈從太祖年最少體態英邁轉鬪英雄神
風凜然事太祖二十餘年歷鎮八州屢更任使雖摧
挫無怨言謙恭慎密以能有成功愈最凡大敵二十
三舉斬將帥三降三手斬士五百餘級生致軍帥人
口二萬二千奇獲艘三千馬牛羊十餘萬

湯和字鼎臣長身饒智幼孤育母姨家時嬉戲跨馬
持稍指使羣稚及長貧無與比肩賣豆漿久之作苦

歎曰有身如此活於賣漿去之濠山後見高帝與壯士數人擊劒喜曰此我所矣領其子弟十餘人繇高帝以從滁陽王爲滁陽王畧地常前行和長帝三歲帝甥王館和獨委心推奉帝威名日著諸將多王部曲顧望未服和恭謹先受命和所從高帝立功者取滁和渡江下采石定太平生俘陳也先和所與諸將分兵立功者舉漂句徇鎮江躡張士誠於錫山蹂之於長興繫之於姑蘇拉陳友定於閩中取懷慶收澤潞入晉鏹關隴襲定西定東勝宣大和林下灰山和所領諸將自立功者守常州括江陰克永新招方國

珍擣夏明昇斫盜姚大膽耘五開獠始封中山侯最
後進封信國公沒追封東甌王賜諡襄武祠像功臣
侑享太廟高帝中年倭時時寇浙東海上郡指揮方
鳴謙者故國珍從子帝以其習海緣之問海事鳴謙
對曰倭海上來則海上備之爾若量地遠近置指揮
衛若干戶所陸聚巡司弓兵水具戰船砦壘錯落倭
無所得入海門入亦無所得傳岸魚肉之矣帝曰善
於何籍軍對曰兵興以來軍勁民朒民亡所不樂爲
軍若四民籍一軍皆樂爲軍也和平五開還年已六
十餘時天下久定中山岐陽二王皆物故上亦春秋

高不欲諸將婁典兵和心知其意因從容乞骸骨上
驚曰卿何出此言然心喜諸公侯見上喜亦皆次第
請上各賜鈔萬錠造第鳳陽第皆壯上還謂和卿尚
強健爲朕一行海上郡爲倭備如方鳴謙所策者而
後還歸和因請與鳴謙偕行至台鳴謙以其客王文
啓見因爲和圖上要害城戍處上一如和請於是設
指揮衛若干戶所於浙東諸郡揀丁壯三萬五千奇
城之和自巡衛城功則盡發散州縣錢及籍犯者家
物工匠往往過所望而城城丁壯多入民家闕其牆
根堵序之石及諸碓礮欄諸城下民多賃舂者浙人

謳曰京囷巨倉公卒聊浪牆除碓磑公城堀畧文啓
謂鳴謙曰浙人謫矣公尚爲湯公一言鳴謙入言和
曰吾聞成遠算者不近量任大事者不細謹若以國
之無備及於戈鋌蔓草生竈下蟲豸生井曰安所得
碓磑乎復有謫者老夫將手刃之不踰年衛城成稽
軍次定考格立賞令四民一軍守之東屬登萊成城
五十九閭中並海城亦成旣報命率其妻胡夫人若
子陞辭賜勅曰天將康民則英才生草野當元之季
天欲興朕實遣爾和置朕左右伍冒水霜師突炎暑
兩陣未決饑渴不時合變須臾以獲生會如此勤勞

三十餘年矣天下大定爾年云邁管爾鄉府挈家言
歸嗚呼三十年于茲視若尋常一旦而歸忽爾欷歔
不能自禁久同患難致若斯之傷也又勅胡夫人曰
惟朕臣和與爾夫人同朕鄉里夫人勤勞啓家克相
立業功成名遂携眷歸鄉嗚呼昔爾夫婦墨髮而來
今皓首矣相夫之功啓家之勞朕當有報於是賜和
白金二千兩夫人千黃金三百兩夫人二百鈔萬五
千緡夫人五百文綺四十有副夫人三十是爲洪武
二十一年其又明年六公還鄉賜皆等然不及夫人
矣和與諸公侯歲一朝朝亦復有賜其後入朝中風

失音車駕幸視惋歎良久卽遣還命其女魯王妃歸
寧侍疾疾良已使其子鼎迎至京師安車入內宴資
有加御膳法酒相屬二十七年復召之鳳陽癰甚今
安車入內摩撫之叙布衣艱難之勞契和不能對稽
首而已上雪涕出藏鏹俾營塋地明年卒年七十親
王遣奠有司穿塚治木具明器祥禪賜祭恩禮備隆
開國功臣蓋唯和最壽而最後死和沉毅不泄勇而
善斷不好兵書臨陣乃決機相勢和得賞賜不入舍
多惠鄉黨父老貧無告者貴極公宰所與故交遺民
意甚懽洽畜勝妾百餘暮年皆資遣之和守常州時

張士誠日遣游士啗以子女玉帛一無所動巡守嚴密國中事無泄張氏不得其間高帝因得以從容平漢荆楚間一日醉而詫其部吏曰我今守此而張氏日來嘗啗我我政如坐人屋騎危可左右顧也語聞上上隱之和亦自媿和守常再拒破士誠軍所謂躡錫山蹂長興其大者上大封功臣始露其前語曰有酒過竟封中山侯和頓首謝而已明年爲征西將軍與副將軍廖永忠等以舟師自夷陵入峽攻夏又以不能卽取歸不卽克夏氏將吳友仁於保安爲上所誚讓蜀平永忠及傅友德受上賞和予彩段八而

而責數其逗撓而姑賜之和復頓首謝又明年和以偏將軍從中山王北討分道擊賊戰斷頭山敗績上以和數失利不任將特時令與太師善長建宮殿甃城郭上卒用微時綰寂交進封信國公云和有五子少子醴積伐至左軍都督府同知征五開道卒其長子鼎訶天再傳皆病廢不及嗣爵絕有孫胤績權奇有俠氣正統中以千戶與中書舍人趙榮使虜久之以裨將守延綏孤山堡虜入寇主將閉門不出胤勸力疾率麾下百餘人歿之和六世孫紹宗弘治中績封靈璧侯其世別見於勲封正德中浙江巡按御史

英言和守備寧波城戍精堅倭至今不敢犯請立廟
定海縣從之登萊吳越海上父老至今指烽戍歷歷
稱湯信公徵信公吾久鯨鯢食矣

郎曰予觀鄧寧河之摧抑不怨湯東甌之受責自謝
而知功臣保世之道焉不然開國諸公何林林也李
沐則肺腑矣獨二公者能與徐常裒然太廟之列耶

李文忠 沐英

李文忠字思本少名保兒肝胎人父貞娶高帝姊漁
泗水上歲儉時有所助高帝久之高帝姊卒保兒方
十二貞聞帝起淮右携之軍中見帝帝見貞衣被襪

裂問曰大才治生得無苦乎對曰苦漁稅保兒牽衣帝喜且泣賜以已姓名曰文忠擇師傅教之丁酉歲年十九以舍人領軍援池擊敗漢戍戍歲陞帳前總制親軍都指揮使司左副都指揮兼領元帥府事下青陽石埭太平旌德敗元阿魯灰破苗獠於潛昌化獲婦女輜重甚多盡燔遣之厲士曰固不足惜努力破敵何止是進次淳安夜襲洪元帥降衆千餘與鄧愈胡大海會取嚴州周人率苗兵水陸至出奇大敗之積載斬馘乘流下瀨以耀周人周軍皆震拒却周軍烏龍嶺進取浦江訪求鄭義門避匿者按堵之

令士毋得焚剽撫元降將員成蔣英劉震三萬人於
桐廬己亥與大海克周諸暨禽人四千從間道破周
軍碧溪胥口使裨將何世明克周將分水斬首五百
級進擊之三溪斬首千餘遷同僉樞密院事守嚴辛
丑城嚴與胡大海援其子德濟廣信生擒漢將明道
及宣慰王漢二釋二之俘使併降其兄建昌將溥壬
寅蔣英劉震叛金處撫定其人民遷浙東行中書省
左丞開省金華總制衢處廣信嚴諸全軍馬以虛聲
破周圍諸全軍乃與胡琛還定處英震走歸周癸卯
昌嚴馳拒叛將謝再興於義烏精騎出其後城新城

以胡德濟守之拒卻周將李伯昇兵遷右丞乙巳伯
昇復以二十萬衆寇新城馳之未至可十里止營龍
潭胡德濟使人問道報曰衆姑俟大軍文忠曰衆則
彼也謀則我也畏衆益衆大軍至亦衆矣無衆不衆
衆乃在我下今日彼衆而驕我少而銳以銳當驕何
憂不擒旣擒輜重皆若有也傳陣仰天誓曰國大事
在此一舉敢重生以輕三軍馳之直出其後衝中堅
手格殺數人衆乘之德濟從城中譟出又乘之斬首
數萬溪水盡殷捷聞徵賜御衣名馬將士賞賚有差
追封文忠母爲孝親公主而封貞親恩侯丙午下浙

江使朱亮祖耿天璧克桐廬袁洪孫虎克富陽進克餘杭且入杭州是時張士誠改周爲吳其將潘原明懼遣員外方彝請降文忠曰師未及城員外約降無緩我乎彝曰將軍之兵動如雷霆旌旗遙指莫不震驚及聞布德勞來秋毫不犯乃始還靈定魄擇託而歸豈有他意文忠見其誠引入卧內津遣之明日原明封籍府庫軍芻并執劉震蔣英以降用女樂導引入城文忠叱去之旣入令諸軍皆止樓櫓上櫓露也上無覆屋造民居者斬一軍借民釜立斬之名見諸元將悉送高帝軍凡得兵二萬糧二十一萬馬六百匹吳元

年誥曰甥文忠幼育帳下比於吾兒弓馬文藝靡不
閑貫弱冠起軍中僉院金華開省嚴陵平烏龍破苗
獠援諸全陷陣衝鋒如遇枯朽比者直擣臨安克其
堅城安堵如故朕自起淮右奄至江左同心一力諸
勲有之國威蔑如惟爾文忠親則舅甥恩則父子謀
畫勞勩與諸勲並是用加爾榮祿大夫浙江行中書
省平章作鎮茲土復爾故姓爾其勗之洪武元年繼
湯和入閩悉平諸山寨二年以偏將軍副常遇春帥
師十萬北征平定開平遇春卒軍中承命領其衆率
師西與大將軍攻慶陽至太原聞元將脫列伯孔興

攻大同急文忠曰大同受敵燃眉之候若待進止其勢益熾閫外之事有利專之皆曰然遂繇代出鴈門次馬邑擒元平章劉帖木兒至白楊門擒其四大王且近敵壘天雨雪身引數騎察閫近山無有伏名諸軍阻水而屯其夜有黑雲壓營文忠曰雲壓營主有賊劫者令馮宗異等伏八萬騎白楊門別令二萬騎飽食無動夜半脫列伯果空壁來文忠以二萬騎誘之皆殊死戰寅至辰度其饑疲分軍左右翼自爲先驅與宗異奮擊大破之脫列伯之部將縛之降文忠手解縛延爲上客元人降者皆喜孔興部將聞脫列

伯敗亦斬其首以獻進東勝州莽哥倉不見虜還於
是元主退保應昌帝欲窮蹙之絕其南向意三年爲
征虜左副將軍與徐達復北出至興和降其將進擒
其平章竹貞於察罕腦兒敗其太尉寶子平章沙不
丁朶兒只八刺于白海子之駱駝山進開平降其平
章上都罕等而都督孫興祖及燕山右衛指揮平定
大興左衛指揮龐禪海寧衛指揮副使孫虎等與胡
兵戰皆死之遂趨應昌未至百餘里知元主殂無程
進復遇元兵與戰大敗之追至應昌圍其城克之獲
元嫡孫買的里八剌及后妃宮女諸王達官所藏歷

代金玉璽寶圭冊斧元太子與數十騎遁率精騎
追之至北慶州見角觶而還返過中興降江文清等
三萬六千餘人至紅羅山又降楊思祖等萬六千餘
人班師還朝上勞于郊其冬大封功臣上曰李文忠
取應昌功最大封曹國公同知軍國事食祿三千石
加封孝親公主爲隴西長公主而封貞駙馬都尉蜀
河西數郡漁稅曰以駙馬故也四年西蜀平鎮成都
五年以征虜左副將軍與徐達馮勝率十五萬騎分
三道並進文忠總東道與都督何文輝等出居庸擣
應昌取和林進口溫河至哈喇莽來虜遁令軍悉置

其輜重廬胸河各持二十日糧兼行至土刺河虜將
蠻子哈喇章悉騎渡河陣而待戰數合稍却進至阿
魯渾河虜益衆搏戰馬中流矢持短兵步戰裨將劉
義直前蔽之指揮李榮授以所乘馬自奪虜騎乘之
文忠策馬橫槊麾衆更進士皆殊死鬪獲虜人馬萬
計追至騁海勒兵據險椎牛享士大縱所獲馬畜示
虜平若虜遲疑不敢近引軍還夜失道糧且盡士多
渴死至哥兒麻思所乘馬嘶而跑泉湧出刑牲祭之
獲故元官屬子孫及軍士家屬千八百四十餘人送
京師是役也宣寧侯曹良臣驍騎左衛指揮使周顯

振武指揮同知常榮神策衛指揮張耀俱戰歿是時
文忠父貞尚在上卽封爲曹國公追封隴西公主爲
曹國長公主貞爲人醇謹上燕見無時車駕時臨幸
之六年屯代出朔明年使諸將出代擒元平章陳安
禮木屑飛於三不剌斬元將珍珠驢於順寧陽門擒
太尉伯顏不花於朔俘元國公鄧孛羅帖木兒於白
登轉克大寧高州大石崖斬其宗王朶朶失里擒承
旨伯家奴遣裨將追斬元魯王於氊帽山獲其妃畧
豐擒胡官十二人虜衆百二十馬駝牛羊萬計十二
年命督軍河峽臨輦得便宜行事擒獲叛逃土酋城

浼守之其明年召還叅贊軍國事十六年使兼領國
子監事文忠沉厚誠恪臨陣先士遇大敵益壯每戰
勝功推下及釋兵近儒生遼遼書史其館中客乃多
詞翰之士文忠常以客所言言上上怒高麗謂與丞
相惟庸通欲討之文忠諫又諫宦者太盛非天子不
近刑人之義上大怒曰此儒生家言何從出爾口耶
安所受之使人盡殺其客時文忠出歸見館客橫屍
牖下病悸不治上爲族誅諸醫及其侍婢六十許人
追封岐陽王諡武靖配享太廟服滿使其子景隆襲
爵予誥曰貴戚之家保富貴者鮮矣貴戚之位忠臣

義士之所矜重奸邪之所窺妬繇是有束手而傾不自重而覆嗚呼守是位者必動止合宜語默無妄靜觀社稷安危察奸邪之所以若有邪臣黨比則秘其事而幽其幾以待一舉而患難爲之捍禦朕姊子文忠命居群將之列功至公位嗚呼非智非謙幾累社稷身不免而自終其薨也三年矣以骨肉之親兼著勞於朝野服制旣終命爾襲爵爾其慎鑒前失永受朕訓文忠諸子增枝前軍左都督方英中都正留守皆上所賜名景隆建文中以征虜大將軍監六十萬兵北禦靖難師陰應燕不力戰燕王卽位封太子太

師增祿千石永樂二年坐法去勲號絕朝請久之谷
王謀反造妖讖謂高帝十八子當有天下上疑景隆
姓追怒之曰汝昔將大將而賣而君能保終忠我下
之獄閉其家不令通飲食其家屬皆發戍遼東初文
忠好賓客游士道人張玄玄者數過其所及將別去
留遺之簑笠粟缶曰有急可披簑戴笠出缶相呼景
隆家既閉發缶而呼種粟卽有穫成祖見其突烟恠
之旣知心不絕文忠不深錮也至英宗中許開門出
孝宗中世其玄孫璿南錦衣世宗中求其八世孫性
績封爲臨淮侯其世別見於勲封文忠九世孫言恭

能文章交諸公間

沐英字文英定遠人故姓李又姓木乃姓沐也八歲父母死帝得之兵間時帝年二十五未子與孝慈皇后養爲子姓之朱名之文英與懿文太子同食起英溫爽有姿槩機穎過人人侍帷幄晝夜勵勤目無迂視帝深器之年十八授帳前都尉守京口久之陞廣武衛親軍指揮使洪武元年以所部從取鉛山下崇安會湯和攻陳友定於延平取之其故將子隆負固不服英與裨將蔡玉夾攻生得子隆將谷保盡定閩地高帝曰母李爾李且朱我朱與之木姓而名曰英

調守建寧節制邵延汀三衛三年授鎮國將軍僉大
都督府事四年遷都督同知進榮祿大夫總天下兵
馬應決無滯最稱上意九年徙填關西威望大著十
年鄧愈爲征西將軍英爲副西伐蕃部川藏與愈三
分兵抵崑崙山俘斬無算得馬牛十三餘萬開土數
千里師還征西將軍道卒代爲將還京師上以子故
封西平侯洮州十八族番酋三副使汪舒朵兒癭唃
子烏都兒及阿卜商等雖嘗遣子入侍而叛服不常
命西平侯與都督僉事藍玉等率河南陝西山西兵
討之至朶甘降其萬戶迄失迦夷其部落進至洮追

擊其十八族酋長職方其地吐蕃川藏皆從風降城
洮守之擊敗三副使衆并擒癭噶子封來獻殺獲數
萬獲馬二萬牛羊十餘萬諸將論功而侯者九十一
人深入死虜以虎賁左衛指揮僉事贈官者一人曰
李實居三年元故將脫火赤及愛足屯和林擾邊命
英討之英遣候騎偵知脫火赤兵次亦集乃路遂踰
賀蘭涉流沙七日夜至其境夜去穹廬四十里嚙枚
四其軍自當前圍擒得其全部以歸還鎮關中十四
年與大將軍達異道出古北口克灰山嵩高全寧四
部取元將宣於臚胸河俘口千餘還京其秋潁川侯

逐至鴉寒山三十年爲征西將軍生擒川陝賊高福興及黨四千餘人於沔後河英兄弟爵通侯有功其女弟侍宮封皇寧妃一門貴盛而獨其弟德成爲驍騎舍人用其酒自放上徙德成都督力辭上變色曰以舍人二兄一女弟故故提舍人等埒之舍人辭何說也德成免冠泣拜曰臣非草木不知上恩顧臣性嬾慢其酒不識緩急付臣事不理上殺我也人生不過畜錢刀食醪肉隨意便了爾上曰善人皆如此可以措吾刑立賜黃封百罌金絲稱之益厚遇德成德成嘗賜宴後苑醉免冠謝見禿顛上笑曰酒狂顛毛

乃可數德成曰臣猶惜其多欲盡削之明日醉解大驚削顛披緇上笑曰舍人若佯邪乃實爲之德成見其家二侯征鎮四方奏俘獻捷輒笑曰虛名亦可聽艱苦亦可受曾如我飲中樂不英大小數百戰身被七十餘創擒斬俘獲一十七萬最爲人孝友仁恕恭儉誠實毋卒廬墓哭泣不絕行師有紀推心任人其苦同之其北征虜夜遇大風雪悉罷遣帳前環軍所攻克州郡戒殺禁掠封府庫收簿籍無一錢尺帛之私家居簡靜不治垣產天文地理百家莫不通貫以儉素書史教訓子孫事高帝四十餘年小心謹慎眷

愛雖隆自處下謙金鎗滿體橫直若刻畫每陰雨痛楚被命出征卽日啓行英毅之氣瀕老不衰上晚節功臣已盡獨英與長興侯備任使永樂元年年六十九卒遣官祭賻有加追封營國公諡武襄丈夫子十二人鎮駙馬都尉尚永嘉公主女九人二爲遼鄂二王妃孫男二十八人孫女十六人一爲仁宗貴妃餘多有勲蔭貴配富貴壽考終始吉令人以比郭子儀云靖難後高帝功臣之世僅有存者武定侯與魏國西平三家而已世宗中英五世孫勛嗣侯見寵勛見世宗方更定郊廟禮儀上言臣始祖英與徐達諸臣

開國之功同能比烈達諸臣物故會當廟建之初臣
祖英卒永樂歲獨不得與功非優劣以先後死也乞
躋享太廟如達諸臣下廷臣議皆言不可戶部侍郎
唐胄上疏曰臣惟皇祖開基二年正月乙巳始立功
臣廟於雞鳴山六月丙寅廟成列祀二十一人死者
塑像生者虛位臣謹按是時胡大海馮國用趙德勝
耿再成丁德興俞通海張德勝茅成皆已死先棲神
下壺蔣子文等廟所謂塑像者也其見在諸臣如徐
達常遇春李文忠鄧愈湯和沐英華高吳良吳禎曹
良臣康茂才吳復孫興祖等所謂虛位者也是諸臣

之功蓋皇祖論祀之日已合生死之臣先定之矣至於太廟從祀古者所謂爾祖從享祭於大烝其典尤隆當廖永安未除之先太廟配享凡十三人永安俞通海張德勝桑世傑耿再成胡大海趙德勝已死七人洪武二年正月丁未已躋在列九年始加封號贈諡而徐達常遇春李文忠鄧愈湯和沐英等六王則各隨其卒之年進侑此皆皇祖親定以協大烝英所得侯平雲南也而非開國英侯之日太廟定祀十有六年矣此時且不得祀功臣之廟况敢望配享哉夫前代之舉此者若漢高祖唐太宗於其身漢明帝於

其父皆親當龍虎風雲之會目擊乾坤再造之真鱗
翼攀附之勞素孚於平居而山海倒排之機又燭於
臨境其翊戴之力雖皆不負山河帶礪之盟而意氣
之興則有出牝牡驪黃之外是以西漢元功十八東
漢雲臺三十有二唐凌烟二十有四歷其世代未有
異議而欲參差之者我皇祖享祀之定寓褒旌於血
食比之前代尤重且悉故其品題爲尤精如六王元
勲太廟功臣兩聯上俎俞通海以下六人與於配享
皆取死事而茅成亦當時死事之臣乃惟與廟祀而
已相從開國凡五百九十三臣十二臣配享而外與

於功臣之廟者僅取馮國用丁德興華高吳良吳禎
康茂才吳復曹良臣孫興祖九人而已而桑世傑者
雖在配享又不得與於功臣之廟蓋其有無差次之
間可以神會而非口舌能言筆墨可盡者位列先後
今尚不可輕移有無額數况得而增損乎若勛所引
祖訓首章得與於三公二侯五家之列其時以掖庭
奉車之貴肺腑之託專言議親不關廟祀也伏惟陛
下寢英配享之議庶在天之靈慰聖祖當日之心額
序之席悅諸臣素聚之魂而英平生謙讓之精爽百
世安食於其家廟不致忤怩非擬之旁則勛知孝而

不知學之誤亦可洗雪而禮樂崇隆統一聖明之世矣世宗不聽竟進英侑享勛別有記

郎曰武定侯侑享雖用勛故跡其當時所得畢世全功名可以知之矣異哉驍騎舍人誕焉自放於嚴主也唐胄之疏吾以比祝子魚之欲長衛焉

名山藏卷之

晉江何喬遠 譔

臣林記

漢武臣二

劉基

劉基字伯溫青田人曾祖濠祖廷槐父爚濠爲宋翰林掌書每陰雨積雪登高丘而望其聚突無煙者賑之宋亡林融爲宋舉義元使使簿錄融株連盡其里濠盛治牛酒延使者其家醉之肱其篋私記其渠率二百人而自火其室使者走火失錄濠佯爲使者游數第以所記二百人上基在元年十一舉于鄉十五

成進士授高安丞揭曼碩見之曰此魏徵之流將來
濟時器也進賢有老人鄧祥甫者善天文見基驚曰
公聰明絕世器識宏深當爲一代偉人盡送所藏秘
書於基基負氣甚豪不可一世士以屈強書生自命
在高安以剛廉不合去方谷珍反省憲復辟基爲元
帥府都事基請興兵捕斬之而元大臣受谷珍金謫
基言錮之紹興基時時往來雲門諸山或爲人擇塋
塋用粒粟法亦數數遇異人得其術會山寇起行省
復召爲都事基自募義兵勦寇與石抹宜孫守處累
授行省郎中大臣錄守江南功基不與遂棄官歸隱

青田山南田山下初基嘗遊杭飲西湖上有祥雲起
西北一湖皆光座客盡驚詫相與賦詩以爲祥兆基
獨大言曰此天子氣也應在建康十年後當有王者
興我當輔之座客謂基狂漸離席去基獨與其門生
沈與京放歌極醉罷基居南田山下讀書作郁離子
十八篇其醜物託類皆悲生民之塗炭歎國法之弁
髦庶幾藏器以遇真主其辭甚多其意一也郁者文
也離者明也其九難篇倣七發七啓而爲之而其末
歸於講堯禹之道論湯武之事憲伊呂師周召稽考
先王之典商度救時之政明法度肄禮樂以待王者

之興客或說基曰今天下擾擾以公才畧據括蒼併
金華明越可折簡定因畫江守之此勾踐之業也基
笑曰吾正惡方谷珍張士誠刺促狐鼠乃與同轍邪
天命有歸姑待之吳公下建康定括蒼基大置酒會
親客指乾象曰此天命也豈人力邪客皆亡去基決
計趨建康衆疑未決基母富氏曰自古衰亂之世不
輔真主詎萬全哉會總制官孫炎以吳公命來聘遂
繇間道詣見陳時務十八策因說吳公曰明公因天
下之亂崛起草昧間不用尺土一旅憑藉他人名號
甚光明行事甚順應此王師也我有兩敵國陳友諒

居其西張士誠居其東友諒包饒九跨荆襄幾天下
半而士誠僅有浙西地南不過會稽北不過淮揚與
明公冠勢而侔威然士誠鼠伏狸候陰欲背元陽則
附之此守虜耳無能爲也友諒劫其君而脇其下下
皆乖怨友諒剽悍輕死不難以其國當人之鋒然實
數戰民疲位乖則不驩民疲則不傳故漢易取也夫
攫獸先猛擒賊先強今日之計莫若先伐漢漢地廣
大得漢天下之形成矣吳公聞基言大悅稱先生而
不名時諸將多從公滁濠間力戰有功基以儒生緩
帶稱軍祭酒陳友諒旣殺花雲於太平弑徐壽輝而

奪之揚言東下聲勢大震諸將多恐議降議奔以人殊基後至睥目不言吳公目基不言召入內問之曰寡人以國委先生今漢兵旦夕壓境諸將紛紛先生默不言有意乎基曰請賜臣劍先斬議降及奔者臣乃言吳公曰寡人願急聞其言而後賜基曰友諒恃太平之勝盛氣東下我師縮朒不稱勢必敗今明公初有建康圖國之始與漢決雌雄在此一舉勝則王敗則虜奈何使諸將人人持所見夫驕易敗也創易懲也敗驕在彼懲創在我臣聞天道後舉者勝王師得人爲本明公若傾府庫以興士怒開至誠以固

人心興王之業在此時也且臣聞者望二國氣敵衰
我狂擒之必矣吳公曰善於是賜基劍令諸將盡拜
基爲軍師有不服者斬之諸將竦然是以有龍江之
捷公以克敵賞賞基不受公還攻友諒安慶不下基
請棄安慶直之江州擣其巢穴友諒出不意喪魄夜
遁武昌其丞相胡廷美欲以江西降而有疑意請無
散所部屬之他將公難之基自後踢公所坐胡床公
悟竟許廷美以得江西旣以母喪辭歸處處有李佑
之賀仁德之變殺主將耿再成括蒼以東皆動搖基
夜入城招諭其渠率傳書内外安撫之詰旦大定基

在處時時語人以吳公必有天下狀處人與其隣近
郡縣翕然皆服方國珍通書於基基說之納土國珍
從之久之公與漢大戰鄱陽湖公坐胡床督戰基占
氣排公床連呼曰公更舟公更舟公倉皇起改舟則
漢礮碎舟皆糜公與漢相持湖中三日基請移軍湖
口以金木相犯之日剋之友諒果以庚寅中矢死久
之諸將奉公爲吳王置太史監以基爲太史令吳王
使徐達常遇春攻張士誠蘇州圍三百餘日不下基
曰蘇城形如螺取螺者擊首則縮擊尾則出齊門尾
也盤門首也擊齊門盤門開矣諸將用其言破之旣

獻俘王意欲殺士誠基密言曰元失其鹿天下共逐
豪傑之士雲合鳥集誰不願帝士誠非有弑王篡君
之罪殺之無名且業已稱王一方其志氣不小臣觀
其人非爲人用者急則死耳莫若好待之王乃使李
善長慰問士誠善長夜過士誠曰主公與足下共起
逐兔之秋人各求所獲非有宿怨深讐也足下於元
又非有不諱之惡爲世大罪也特以天無二日民無
二王天下之勢終當一耳主公推心置人待足下固
甚厚足下若愛其餘生順天之命異日者亦得剖符
裂土世爲休臣士誠堅卧不起出言不遜善長大怒

爲出是時改監爲院基爲太史院使已爲御史中丞
仍兼官吳王卽位爲天子置汴梁爲北都車駕行視
之使基與善長居守基督察奸惡輦轂肅然宦者監
工不肅卽亦啓皇太子逮治之中書省都事彬好事
覺基馳奏請誅彬旣得旨李善長以省僚欲庇之會
天旱請基緩其獄基不從曰除奸彬天必雨竟殺之
帝還善長言基專恣左右畏基亦短之帝皆不問會
有妻喪告歸其冬手詔召還曰前太史令御史中丞
基世居括蒼懷先聖道天下初亂聞朕親將金華旋
師建業卽別里間捐丘壠應聘而起相從羣雄未定

之秋居則匡輔治道動則仰觀天象發縱指示無往
不克曩者攻皖城拔九江撫饒郡降洪都取武昌定
處城內變爾多輔焉彭蠡鏖戰砲聲激裂若雷臨首
軍士大呼鬼神號怒自旦至暮如是凡四爾時在舟
同我患難今秋告歸久而未至朕心缺然今天下一
家爾當疾來同盟勲冊言非儒造實出朕誠爾遂命
駕良慰朕心既至賚賜甚厚追封其祖父皆永嘉郡
公洪武三年授弘文館學士其冬授開國翊運守正
文臣資善大夫護軍誠意伯祿二千石曰吾子房也
上賦處州御史大夫章溢請加之宋賦畝五合上曰

青田便畝五合而已今伯溫鄉里世世爲美談四年
春賜老歸其秋手書付基曰近西蜀悉平稱名者盡
俘京師我之疆宇不少前王胡元以寬失天下朕今
拔之猛然小人但喜寬恣謗罵國家扇惑非非莫能
治卽今天象屢見天鳴已八載日中黑子見三年今
秋天鳴震動日中黑子或二或三或一日更有之更
不知災禍自何年月日至卿年高靜處萬山中必有
真知今遣刻期往卿問訊使行勿賚茶飯返之基悉
條對而焚其草大要勸上國威已立宜少濟以寬大
云基還隱南田山中飲酒奕棋而已口不及功守令

訪見皆不得一日今微服爲野人入山求誠意伯誠
意伯方濯足水際而固從之因引入茅舍攝衣出爲
黍食今今告誠意伯曰不佞青田今也誠意伯驚起
稱民因別去其後今終不得以微服見矣初高帝嘗
與基論相基謂楊憲汪廣洋胡惟庸皆不勝相惟庸
嚙之而甌括間有地曰淡洋南界福建元末奸民盜
賊其間方國珍所錄亂基嘗言上設巡簡司守之而
民作奸如故適盜周廣三反溫處吏匿不以聞基今
長子璉徑詣上奏不先白中書省惟庸以前嚙使吏
訐基言淡洋地有王氣基欲得爲基民不與則請立

巡簡逐民家庶幾動上聽遂飲章以聞高帝奪基祿
基跳而見帝自引責而已殊不辯竟侍帝京師不敢
歸家八年春病惟庸拉醫來中其蠱遂篤帝命傳送
歸臨盡以天文書授璉曰服闋進之吾後世子孫毋
習也且語璉爵當中絕五世而復始基之從帝也帝
使馮勝從基授進止基告勝夜半出兵至某所見某
方青雲起卽伏兵頃有黑雲起者賊伏也日中後黑
雲漸薄回與青雲接者賊歸也躡之可盡擒衆初莫
信旣果然始以爲神遂奉而得勝基赴京師道建德
張士誠正人寇李文忠欲出擊基止之曰不出三日

賊當走至期登城望曰走矣衆見其壁壘旗幟如故
鼓方嚴基趣文忠疾迫壘則皆空而留其所掠老弱
嚴鼓而已遂追擒之他日入見帝欲刑囚語基夢以
頭有血而土傳之故欲刑囚基曰頭上血衆也土傳
之得上得衆之象應不出三日帝停刑待之果有海
寧之捷帝悉付基囚使縱之基以先占奇智佐高帝
有天下言奇事者悉歸基亦聞曰帝初營中都而城
之基曰臨濠興王之地當避國姓國姓音豕豕不可
園帝用基言而有意都焉基曰金陵負山之險扼江
之阻江南形勝帝王之都中都雖帝鄉非建都地帝

乃止帝之都金陵也使基相址既定基出帝移其址
數寸明日入驚曰誰改臣址帝曰我也基對曰固當
恐當終遷耳旣成帝與基周觀之曰美哉居乎承陽
而納陰永世之業也基對曰美則美矣燕子得入焉
帝曰吾以朱絲網簷鍤網障棋燕安得入哉又一日
帝與基周觀之曰美哉居乎冠山而表江王氣之聚
也基對曰美則美矣雞鳴山猶有王氣帝明日幸雞
鳴厭之帝治方中鍾山孫權之塚當其前基曰臣聞
聖人治天下骹骼潤澤枯槁榮茂孫權人雄也稱王
於吳彈壓江東毋除殘魄爲陛下守門不亦可乎帝

曰爲其後成祖入靖難先卽位于雞鳴山乃知基所言燕者燕也雞鳴山王氣者燕王卽位也初高帝問基卿幾子對曰臣子二曰璉曰璟帝召見之曰阿璉明秀阿璟凝重基曰臣子璉有相才無相器臣子璟過剛不中終不得其死然璉爲江西叅政帝常欲相之亦爲胡惟庸黨所脅墮井死遺子廌七歲初基封止其身而已惟庸敗上念基欲使璟嗣璟讓廌帝悅賜之衣服鞍馬居室授閣門使封廌爲誠意伯誥曰昔者元運旣隳海內瓜分豪雄鼎峙當是之時士大夫甚衆然亦汎然從人以至輕滅姓氏所以賢智之

士樹勲奠民必擇人而歸又若非義之從雖死不移
噫雖死名彰已朕初與羣雄並驅孰辨真僞爾祖誠
意伯基括蒼之士居勅敵之陞一聞朕命問道兼程
星馳來歸陳曆數之有在議戡定之先機其爲人也
義氣凜然莫之敢犯所以父子相繼沒於奸邪初授
伯爵以終其身今特以前爵授爾增祿二百六十石
共食祿五百石子孫世襲爾其敬哉薦四傳孫祿皆
幼不爵景泰中授祿翰林五經博士祿孫瑜弘治中
始授衛指揮蓋五世云正德九年贈基太師諡文成
嘉靖十八年侑享高帝廟瑜仍嗣伯璟見別記

卽曰世言誠意伯讀書山中山石忽裂伯竄人其中
取出陰符經其後多驗用伯死遺令燔屍揚灰皆謾
誕不足信及觀世所傳基竊怪基以名世才佐高帝
五百年之會不合徒多畸略小謀取屢中而已予居
京師得與伯九世孫志學游爲余言伯所佐高帝皆
廣論大義志學言其家有諸父年九十餘具述如此
因稍采而兼存焉伯奇智先占而不免胡丞相之毒
何也跡其明哲保身視子房讓矣至文治武畧求古
佐命之臣可謂兼焉

李善長

李善長定遠人高帝始下滁善長道傍謂從高帝郭
子興館中爲主文掌書記甚見親時帝年二十七善
長四十一矣高帝威名日盛子興疑焉悉奪左右任
事者置其麾下善長不從高帝從容問善長曰四方
戰鬪何時定乎對曰昔秦鹿失馭漢高帝以布衣起
沛豁達大度知能善任不嗜殺人五稔而興今有元
之政與秦同虐海內怨畔羣雄蝟奮此亦逐鹿之秋
也王公起家與漢同符程義而動天下不足定矣高
帝曰善漢高所用張良韓信蕭何三傑者皆人傑也
吾有徐達之武或可媲美先生當良何乎對曰留

意數絕人善長何敢望良若供給餽餉使三軍之士
數千里不乏不敢後何矣帝旣總和陽兵威名益著
子興諸部曲與帝不咸善長常爲帝居諸部曲閒帝
城和陽使善長守之而出擊元太子禿堅副樞絆住
馬民兵帥陳也先元兵乘帝出猝寇和陽帝趣歸禦
之善長已先擊却元兵久之高帝東渡江有江左命
將四伐皆善長飛輓轉漕給軍食自其以吳公起至
有天下出征省濠幸汴皆留善長居守善長始爲帥
府都事累叅知政事公爲吳王以爲右相國久之定
官儀尚左爲左相國漢吳旣下率羣臣奉表勸進王

卽皇帝位拜銀青榮祿大夫上柱國錄軍國重事中書左丞相宣國公兼太子少師天下已平凡大典禮大刑賞大封拜大纂錄及臣民之制百官之服色受民田數榷設科賦給恤死事者之後皆善長裁定洪武三年大封功臣高帝曰李善長雖不汗馬貫札從戎行然朕起草萊提三尺率衆數千居羣雄肘腋閒未有定期善長來謁轅門傾心協謀從渡大江東征西伐日不暇給善長獨守國轉輓給噐仗不乏撫和軍民無有詠姍比於蕭何諸臣中善長與右丞相達功最高封善長韓國公叅軍國事食祿四千石居達

上身免二死子免一死四年念久勞特許老七年移
江南民十四萬實鳳陽給牛具官監墾荒善長爲大
監留鳳陽數年上推恩擢善長弟存義太僕丞以皇
長女臨安公主歸其子祺拜駙馬都尉公主下嫁初
定婚禮婦順甚脩時人榮之居一月御史大夫汪廣
洋陳寧紉善長自子祺尚主後憑寵自恣陛下病幾
旬不起居祺六日不朝宣前殿不施禮大不敬請付
所司善長父子免冠請罪上赦之善長爲人寬博有
器略中意思不能平專處僚友多愎在上前凡事不
先發時爲小人覆過或時譴訶不當罪強爲對上謂

善長柔奸嘗賜勅曰爾太師善長昔當擾攘挈家倉
皇謀生無所朕時帥師滁陽爾迎于道朕待爾腹心
用如手足朕無上智于爾爾或小疵朕置不問遂成
命世之英今無謂朕忘乎朕報功之誠神人共知爾
年雖邁精力可爲何至比小吏枉功臣寅昏定擬詭
辭符奏國有定律奏對不實者杖心欺者斬卿欺矣
然大封有誓免爾三死今削祿千四百石爾其聽之
克謹後戒庶有嘉貞頃之復勅曰人臣脩身潔已靜
性存公言行確孚表裏端一然後匡君求善以治生
民未聞符同小吏構詞飾非惟心欺誑一至事覺意

在捨身受責恃頑強巧面對無知朕若懷猜篤疑爾何生焉前勅釋爾所犯爲爾寘頑復如是告朕憫相從之久姻親之重枉法恕爾爾其懷之先是左丞相胡惟庸故銜誠意伯基基病使醫盪之久之事泄上問右丞相汪廣洋廣洋爲不知也十二年廣洋誅惟庸懼其明春惟庸子市馳馬馬奔入輓輅中傷死惟庸卽殺輓輅者上怒命償輓輅者命惟庸但以金帛予輓輅家上不許惟庸復懼誑言所居井湧醴泉請臨視宦者雲奇知其謀乘輿將西衝蹕抱勒倉皇言駛不能出左右驟而雜捶奇奇垂斃右臂且折第指

惟庸第不勝指猶指上悟登城覘之衷甲之士伏於
帷間於是御史中丞涂節告惟庸及御史大夫陳寧
反并其蠱死劉基事以善長弟存義之子佑爲惟庸
兄壻辭連善長若吉安侯陸仲亨平涼侯費聚時聚
已前死上宥善長仲亨不問也而誅惟庸寧及存義
羣臣言涂節本爲惟庸謀主見事不成始上變告亦
併誅餘黨皆連坐始上自誅楊憲後專任胡惟庸爲
丞相丞相權至重諸司封事先白後以聞有不便者
徑去不奏四方奔競日至丞相門武臣諛佞者多附
丞相丞相家饋金帛名馬玩好不可勝數功臣惟徐

達劉基最重亦惟二人知惟庸奸無所與而善長以
與惟庸姻屬深相結也惟庸定遠人其舊宅井中忽
生石笋數尺祖父塚有夜光惟庸益自喜而御史大
夫陳寧者茶陵人其始爲小吏通經有治才從軍至
金陵館軍帥家上命諸將各言事軍帥武人不能言
寧代爲書上覽稱善召見擢江南行省掾史累官御
史大夫寧知蘇州烙人以趣餉上責其酷其子孟麟
亦數諫寧寧怒杖死之上曰寧于子如此何有君父
寧聞亦懼而當是時吉安侯璫自陝西乘傳以歸上
怒責之責求盜于代平涼侯使撫蘇州不任事酒色

而已召還責招降鞬韃無功亦被譴惟庸因陰謀誘脅二人往來交密二人過惟庸家酒酣屏左右言公等數被譴一旦甚之奈何二人惶懼無所出惟庸因告以已意且令其收輯軍馬以俟皆從之惟庸因與寧謀邀至省中閱天下軍馬籍今都督驤取衛士遇寶及亡命進等預爲腹心而復令存義陰說善長善長驚悸曰爾何出此言滅族矣存義不敢應去之旬日惟庸復謂存義成事當盡捐淮西地王太師善長驚不許旣歎息起曰吾老矣恣爾之所爲存義還告惟庸惟庸喜因過善長善長延入內惟庸西南坐善

長東南坐屏左右欵語遙見頷首而已而皆不得聞
惟庸因使指揮賢下海招倭約掠庫兵納倭舟中因
其入貢而以爲援河南人封績者故元臣來歸上官
之不受遣還鄉又不去坐謫戍邊惟庸遣封績書請
因以臣元引兵爲內應蓋上命廷錄涂節所告親臨
問之而其獄辭如此至上所下詔書第言丞相汪廣
洋御史大夫陳寧淫昏不率坐視廢興以致丞相惟
庸夤緣爲奸枉法惠罪撓政誣賢而已始羣臣之請
誅吉安侯及善長也上謂吾始識善長故吾里中長
者言多合意因爲吾掌簿書贊計畫功成爵以上公

吾女與其子陸仲亨年十七父母兄弟俱亡恐掠於
亂兵持升麥藏草間朕見呼之相從有今日此吾微
時腹心股肱以故皆不問於是復命善長爲御史大
夫二十一年肅清逆黨榜列勲臣五十七人前善長
如故又二年所善長年七十七矣菴不能飭下有言
其私鑿邑中水達淮便芻粟治第從信國公私假衛
士三百信國公怒不與京民向通惟庸法當徙邊善
長受其贓數奏請給其親上固疑之其夏會有星變
古爲大臣災上大殺都民之怨逆者應之善長爲請
元曰就中亦有良民上怒曰善長事朕二十九年陰

陽朕意凡事皆待朕發端念或有過則可歸責於君
父斯可居上公理天道應陰陽者邪善長昔爲胡黨
得曲原乃爲不良民求情而前是永昌侯藍玉敗元
兵于捕魚兒海獲封績善長庇之不奏有告之者至
是下獄訊反狀收績往來私書有善長手跡監察御
史復論劾善長追理胡惟庸事鞫善長家奴謙言惟
庸爲寧國知縣時善長薦爲太常卿惟庸以黃金二
十斤爲壽善長送家奴子忠等四十人於惟庸惟庸
厚與金帛酬善長回回國古劍及白玉酒壺玉刻龍
盤盞玉蟠桃盃仲亨家奴亦告仲亨及延安平涼南

雄三侯私事羣臣奏善長等當誅上不許復使讞皆具伏上召善長流涕而語以開創君臣之際善長出遂自殺也存義之子佑及四侯皆賜死上命禮葬善長厚卹其家爵除善長既死羣臣無敢爲上言者虞部郎中王國用上書訟寃曰臣聞君親無將臣子誅意惡莫慘於逆天下所共聲幽明之同糾也雖然臣聞世有輕重福亦有輕重禍擇重福者易輕禍釋重禍者薄輕福人心之或然者也竊見太師善長與陛下下一歿生畢謀智以得天下爲勲臣第一生封公歿封王男尚公主親戚被綺繡福莫重焉當元之季異

姓烏集超張奮霍欲如陛下者甚衆然卒陛下得之
天也其始異姓豈得奉頭牖下哉莫不薰粉耘折爲
世大悲禍莫重焉夫人之親其子孰與親其兄弟之
子安享萬全之富貴孰與侂倖萬一者之富貴不格
明甚雖至病狂必不易也善長於惟庸兄弟之子之
親耳於陛下子之親也卽謂善長有病狂心欲自爲
臣猶未敢深理今謂其佐惟庸者萬一成事不過勲
臣第一耳矣生公歿王耳矣尚主納妃耳矣富貴亡
增加侂幸焉是重福之所無擇而重禍之所必至者
也善長年四十一從陛下四方之事今七十餘挺解

摧頽鼓舞倦矣其子又託禁掖骨肉之親夫爲此者
非其血氣槁暴橫動於中則必有深讐急變大不得
已而後父子之間或至相挾以求脫禍兩者無一焉
平居晏然忽起此端此臣所以爲善長疑者也若謂
天象告變大臣當灾則殺人應之豈天心與王憲哉
善長已不幸失刑臣猶懇惻爲陛下明者願陛下作
戒於將來也其時大理少卿陳輝亦上疏如國用言
上皆不之罪

郎曰蕭何雖買田宅自污而不治垣產曰後世賢師
吾儉彼亦有以自高於人主善長當日月之下雖破

私相愛猶慮不足以承之也况有所徇比而賈惠於夫人進言雖忠服刑雖不衷欲錄以免難矣

吳良吳禎合傳

耿炳文

吳良定遠人與其弟禎俱以勇略聞太祖起滁濠良兄弟以里中兒從行間常先驅多功軍中有祕機良能沒水追伺而禎異服爲間諜良旣從常遇春破江陰太祖使爲分院判官以五千兵戍之尋陞指揮使江陰與吳士誠接境良以五千兩敗其衆數萬因以扼吳使不敢沂大江與漢人結連合從而高帝得壹意戰荆楚間良戍江陰十年晝則披甲乘障夜則枕

戈警備內外姦人不得出入暇延章縫論書史絃誦
相聞自持淡食苦無所嗜好太祖召勞之曰吳院判
保障一方使我無東顧憂車馬珠玉不足旌能儒臣
宋濂等其歌詩美之既追吳巫子門過江陰勞軍周
巡壁壘歎曰卿非昔日吳起乎吳平加昭勇大將軍
蘇州衛指揮使鎮吳良在吳一如治江陰時矣洪武
二年置全州守禦千戶所命領精銳往守之三年進
鎮國上將軍僉大都督府事其年封江陰侯五年以
爲征南將軍擊廣西右江諸蠻盡平其地進靖辰靖
諸州五溪蠻入銅鼓破五開收渾溪踣騰浪附篤基

越漂洞開太平服地青臧隆徙通洪州鐵情洞崖山之衆於銅關鐵寨古州八萬之蠻皆懼而降渠陽之民相與刻石紀功良女爲齊王妃齊王封青州使良建宮留青二年卒追封江國公諡襄烈賜塋鍾山陰命詞臣撰文勒碑禎以天興右翼副元帥從良戍江陰與俞通海擒士誠水將定於石碑從高帝追吳王子門從大將軍克吳姑蘇元年爲征南副將軍與御史大夫和討方國珍於明州入曹娥抵車廐戰盤嶼降之復與御史大夫航海入閩克陳友定西南水部三門其明年與御史大夫擒友定盡平閩歸次昌國

勦海寇葉陳二姓於蘭秀山久之復以靖海侯督餉
定遼完城練卒盡收遼海未附地復以統兵都督僉
事領江陰四衛舟師捕倭至琉球大洋獲其人船詔
復往浙東籍故方國珍所部三郡兵三郡亡賴人蔓
引平民富家臨海知縣王士弘上書言狀罷召還禎
先良卒追封海國公諡襄毅初高帝爲中山王造第
表其里曰大功良兄弟醉而暮過之間從者曰第曷
稱大功曰無如魏國公所以賜也良曰我等與魏國
公皆從陛下左拮右捍以有天下陛下獨表達里大
功誰無功乎上聞笑曰姑徐徐於是爲良禎人建宅

一區於江陰宅甚壯良子高建文中以總兵守遼東數以遼東兵攻永平成祖使人間高建文君疑之削高爵既卽位復之使守大同八年上北征班師高稱疾不朝縱家人給驛私役有司車牛擅以守邊官隨行坐免爲民洪熙初尚以前罪謫戍海南

耿炳文濠人與其父君用歸高帝帝見質孫德崖軍炳文左右甚至從渡江拔采石取金陵皆父子相從領軍張士誠宜興之戰君用騰柵前死炳文代父將下桐川取長興戰敗士誠將西門遂克之高帝名長興州爲長安州立永興翼元帥府以炳文爲總兵都

元帥守之炳文擊却士誠將原明上新橋與左都元帥劉成擊却士誠將珍城西門久之改永興翼元帥府爲永興衛親軍指揮使司以炳文爲指揮使復與費聚擊却張士信兵獲其將興祖炳文以都指揮守長興孤城血戰者十年當是時也北有吳良守江陰常江之門南有炳文守長興扼吳之關士誠所以不得北窺而獐獍轉戰於其東西境久之從徐將軍達取湖破蘇以大都督府僉事從大將軍征中原克沂益諸州郡以鎮國上將軍從克汴河南大同懷慶澤潞平陽太原復以其軍從大將軍征陝西元將張思

齊李思道夾武功東川而陣炳文乘隙伺進一日二
挑戰身不解甲蓐食者數月思齊奔鳳翔思道奔涇
陽而大將軍因得入陝炳文從中取割凍葆供億西
入軍洪武三年封長興侯與大將軍大破故元平章
乃兒不花於北黃河討平曲靖並晏諸蠻於雲南與
定遠侯弼北征哈剌哈獲故元餘孽及其妃后於捕
魚兒海殲妖盜於兩當以征西將軍勦平蜀寇獻俘
三千餘建文元年以征虜大將軍距靖難兵於真定
靖難後刑部尚書賜左都御史瑛劾炳文衣服器皿
僭飾龍鳳玉帶用丹靛炳文懼罪暴卒子璿尚懿文

太子女獻後軍都督僉事瑄散騎舍人擢尚寶卿先
後獲罪必璿獻名見於別記炳文有伯父君美從克
淶和炳文與費聚擊却士信兵君美子瑞力戰中矢
死從弟忠亦有戰功爲叅將

郎曰高帝始取天下慮吳漢相結使吳良守江陰耿
炳文守長興先以剪漢羽翼漢斃然後併力向吳亦
惟二臣稱任使當時論者謂二人善守之日吳已亡
矣逆黨肅清榜示勲臣儼於徐鄧可謂在上心者
乎

廖永忠

楊璟

廖永忠永安弟也從其父旺及永安諸兄以巢湖軍來歸高帝曰此黃口兒亦欲圖功乎對曰得事明主効尺寸無論少壯矣高帝悅屬永安水將以永忠副之從渡江拔采石太平蕪湖擒陳也先破蠻子海牙及也先子兆先乘勝定建康克鎮江宣城討江陰海寇功與其父兄埒久之永安與吳戰敗吳人羈之高帝以永忠爲樞密僉院領永安兵漢友諒入寇龍江永忠與張德勝乘勝追及於采石大呼奮擊之復太平徙同知樞密院事從征安慶與俞通海輩擊漢水寨破之長驅至江州漢將守江州甚嚴永忠度其

城勢架橋舟後反舟而行名曰天橋至其城下與女
牆齊接而登克之復與趙德勝攻下瑞臨吉安諸郡
從征漢戰鄱陽拚身當軍出高帝舟於圍以葦荻七
艘火漢漢友諒竟中矢死從征降友諒子理武昌徙
湖廣行中書省左丞賜之鏤金之額使懸于門而予
之曰其鏤文曰功超羣將智邁雄師從徐達常遇春
征吳淮東禦吳范蔡港盡平淮東諸縣還與徐達常
遇春克吳徙榮祿大夫中書省平章加征南副將軍
帥師出海道與征南將軍湯和會降方國珍海上高
帝卽位徙兼同知詹事院事與湯和引兵轉下福州

原缺

略定閩中諸郡降元叅政文殊海牙於延平執其平
章友定復以征南將軍與副將軍朱亮祖從海道進
取廣東西諭降元右丞何真於東莞吉安侯陸仲亨
既略定英德清遠曲江連州肇慶諸縣行至廣興永
忠會遂降元廣州將盧左丞等盡有其地斬僞叅政
邵宗愚捕誅諸豪遣副將軍朱亮祖馳諭九真日南
朱崖儋耳三十餘城進兵廣西次梧降元達魯花赤
拜任行省平章者林與副將軍追元尚書普顏帖木
兒張翔於鬱林死之潯貴諸州皆降乃使副將軍出
鬱林與楊璟合圍靖江克之執元平章也兒吉尼降

平章咬住叅政那海於南寧復使指揮耿天璧擊敗
平章阿思蘭於象州二廣悉平班師還京高帝命皇
太子率百官迎勞龍灣入見撫慰懽甚還命皇太子
送歸第洪武二年也其明年大封功臣而永忠使所
善儒生探上意以此不得公封德慶侯其年以將軍
副征西將軍和與潁川侯同伐蜀引兵至瞿塘濫舟
踰關放之上流大破蜀師乘勝抵重慶次銅鑼峽蜀
明昇出降天子曰廖將軍破瞿塘下重慶降明昇功
不在潁川侯下加賜鑲金而旌之平蜀之文永忠號
令嚴明所至威惠洪武八年坐僭侈失人臣禮下獄

處子權嗣權從御史大夫丁玉征松疊湯州從潁川侯征雲南皆有功權子鏞銘鉞鏞銘名見於別記

楊璟合肥人本儒家子乃喜武以軍萬戶從定金陵以軍總管從克鎮江徇下金壇常州江陰以帳前副都指揮使從高帝親征婺以行樞密院判從擊漢屢敗之以湖廣叅政從徐達攻故漢將瑯於荊州鎮之討湖廣諸洞蠻降慈利土酋厚進降故漢將義亨於澧以湖廣行中書省平章爲征南將軍偕左丞周德興叅政張彬率楚中兵取廣西進擊永興元守將祖勝戰擊敗其援將全州守思蘭進與祖勝戰南門獲

其將鑑圍其城與鎮撫呂琛指揮袁子明擊敗其援兵湘水獲其萬戶武等千二百三十九人進取寶慶使千戶王庭擊敗元將於茱萸灘轉攻全州全守思蘭遁皆下之盡降道寧藍山桂陽常寧武岡諸州縣其年永守將祖勝食盡自鴆死下永耒陽諸州進攻靖江屯師北關征南副將軍朱亮祖以蒼梧之師會於東門象鼻山決其濠水築堤並城克其北門元裨將榮射書約降縋城出見璟與之白頭百餘異軍夜入其城執其將也兒吉尼下令禁剽掠殺傷遣兵攻

一州以偏將軍從大將軍徐達征潞與元將

戰韓店敗績從大將軍征太原克之與左丞周
定唐州之亂以平南陽入蜀招諭夏明昇還復定
慈利土酋屋之叛及綏寧亂民天祐衆然久乃克之
以管陽侯入蜀與夏戰瞿塘不利陷軍五千竟克保
軍以副將軍定辰州一十八洞九溪九渡蠻上數以
謁瞿塘若久不克覃屋寨詰責璟久之璟死追封芮
國公諡武信竟追論逆黨除

卽曰上有天下開中原則大將軍諸人南方唯閩中
二廣下閩雖胡美要湯和李文忠沐英先後之其功
分且皆傳檄而定若二廣底平廖楊矣

郭英

郭英臨淮人父山甫高帝微時過之山甫驚異留饌酒酣備陳天表之殊他日當大貴大貴毋相忘上去山甫語諸子曰吾視若曹殆非執耒耜者若皆可秉珪乃知錄此人謹事之因以子女入侍英兄名子興以與滁陽王同名但名興其始起事滁陽王從高帝渡江圍常州晝夜冒矢石衣甲生蟣蝨克漢及吳往往累創戰從大將軍取中原守於潼關與指揮于光乘勝擊破元人來攻潼關兵追奔數十里元人不敢一迹南徙封鞏昌侯卒追封陝國公賜諡宣武英長七

八精騎射年十八從高帝起以謹重見親每直宿帳下從渡江征無錫傷右脇攻破常熟傷左足攻安慶傷左臂攻高郵弩傷右膝屢立功上呼爲郭四從戰鄱陽身負金瘡敗漢禁江燒其船友諒中矢歿或言英功英辭讓從征武昌戰保安門傷手足漢將陳同僉馳入高帝軍高帝呼郭四英躍馬立鎗賊高帝衣吳赤戰袍曰吾尉遲恭也從開中原以精騎三千破虜通州從常將軍取太原請夜劫王保保軍潛以十餘騎入營常將軍引兵繼其後大克之兩與元僞王戰俘獲甚多箭傷面足累官驃騎將軍河南都指揮

使使鎮河南上以英女弟掖庭故至英第餞之賜白金二十罌殷馬二十二疋英至綏輯流亡遠邇來歸日以千計期年戶口完增河南大治居五年移鎮北平士女遮馬數十里有泣下者旣去生祠英英至北平元左丞允中等聞英誠德來降者九千餘人上勞吳上尊羊馬授龍虎將軍北平都指揮使居五年召還陞前軍都督府僉事是爲洪武十三年其明年從穎川侯征雲南領兵五萬與都督陳桓趨烏撒道多隘諸軍欲深入英曰攻遠必自近遂先攻赤水河路時久雨河漲英令軍中砍木爲筏出不意宵濟生擒

烏撒并阿容諸蠻進剋曲靖越州關索嶺明年以騎
兵五千攻江川椅子寨火之進降大理金齒克廣南
與西平侯攻安寧富民一日夜破靖州七寨傷左股
取仁德姚安援楚雄明年與潁川侯平蒙化鄧川諸
州前後斬首萬三千餘級生擒二千餘人收精兵人
馬數萬船千餘艘蠻民降者數十萬戶雲南平論功
封武定侯二十年與大將軍馮勝討納哈出旣旋師
王保保弟詹同脫因來追英連戰數十合傷左脇箭
中右脇佯呼虜傷甲竟却之其冬爲征虜右副將軍
從征虜將軍藍玉討殘胡沙漠明年至捕魚兒海邏

騎偵虜營不遠英令諸軍小憩飲馬嘶枚卷甲倍道馳至虜王率十餘騎潰圍遁手刃其將蠻子太尉獲其金寶珍玩圖書馬四萬餘匹降其將五萬餘深入生擒虜將咬咬司徒及曩宗太尉曷古達兒古不達刺王子等四萬餘人馬駝萬五千匹牛羊輜重無算師還賜白金千兩鈔八百錠綵幣四十匹明年春與諸將同加賜資遣歸鄉又明年獨召還賜坐權語命統禁兵京軍御史承祖劾英養家奴百五十餘人擅殺男女五人不問也二十四年虜酋阿剌失里寇邊英克總兵討之朶顏山俘其人口五百餘馬千餘匹

傅友德爲征南將軍征雲南英爲副高帝爲英易木
曰沐曰南方火也以其克之勿用生之英至雲南元
梁王將達里麻以壯兵十萬拒曲靖英謂潁川侯曰
彼謂我師罷於深入未有虞心正可破也倍道進江
霧不見人冒及於白石霧歛達里麻見英軍江上大
驚潁川侯欲濟英曰未可也我軍遠來形勢旣露利
在速戰乃整師臨流勢若欲濟達里麻果擁精銳扼
水土英別遣一軍從下流潛度出其後聲角建志達
里麻軍皆亂英使輕猛善沒者先涉長刀蒙盾斫其
軍元人却數里趣師畢濟整之潁川侯進戰數合英

縱鐵騎入之連斬數十百人生捉達里麻捕甲士二萬馬萬匹死者屬十里潁川侯與諸將分兵進英從左副將軍藍玉趨雲南梁王入羅佐山自縊死悉定雲南地自定雲南至出師數往凡百日東北出烏撒與潁川侯會得七星關以通畢節十五年徇建昌徵江臨安沅江尋甸楚雄皆下之士酋段明據大理搤下關左副將軍玉使定遠侯王弼繇河水東趨上關自率衆抵下關而使都督胡海洋夜從閒道出點蒼山後建志其上昧爽我軍抵下關英騎涉河水齊馬腹斬關而入拔之還與潁川侯傅友德合攻烏撒東

川之復反者又東攻諸蠻之未服聽者其諸蠻部雲
南者乘英東復反英引兵還與都督馬誠僉事謝熊
剿殺之斬首六萬生捕四千皆震服天子使傅友德
班師而鎮英雲南英辦方物揆貢賦愍民數和力役
疏其節目以簡易其人麓川之外緬車里之外八百
媳婦皆內回十七年移師剪除廣南維摩餘孽以通
回州糧道巡撫甸安而還上曰朕有英而無南顧憂
英奏雲南地荒廣請令軍士屯糧上嘉英如趙充國
也於是葺壘城池設營堡開屯田立傳置二十一年
百夷思倫發降復叛入寇馬郎他郎甸之沙摩勒英

道都督甯正擊破之斬首千五百餘級頃之思倫發復以三十萬衆衆百餘大寇定邊新附諸夷皆動英自將兵二萬討之選驍騎三萬晝夜兼行旬有五日使馮誠挑以輕騎百餘百夷以萬人驅衆迎戰指揮張因以五十餘人射什衆追殺其酋長大呼而入斬首數百級諸軍皆乘勝進英使軍中列火銃神機矢爲三行衆來前行發不退次行發又不退三行發明旦緬人悉驅衆來背欄楯竹箴鉤鈇鑪鎌左右襍標英三其軍馮誠前甯正左湯昭右下今日聞砲齊戰捷一級一隊賞退一卒一隊戮鼓之前行之矢發銃

砲震動山谷中象皆挺透決驟英軍但呼而鏖戰緬
大紛挐戈甲憂摩飛血塗濺指揮張因與千戶張榮
祖乘勝追之盡焚其寨昔刺亦百夷之勇人也復來
殊死戰英望見左隊少却曰取其隊首來左帥顧見
與其衆死之大敗緬人斬首三萬級俘萬人緬人戰
則其渠率縛身坐象累革兜披鐵甲於是皆身中百
餘矢殪象背上其衆連日不得食死者相枕思倫發
遁去英還師雲南所過城邑爭持牛酒郊勞威名紛
紜蠻夷中其夏東川蠻復叛上命穎國公仍爲征南
將軍英爲左副將軍普定侯陳桓爲右副將軍討之

論其脇從越州會阿資者先是其父龍海與廣西赤
部酋者滿矣情通以叛英自將擣殺者滿矣情俘男
女千毆畜產稱是龍海遂降徙之遼東至是阿資又
叛英遣都督審正從穎國公討之殺其黨火頭弄宗
等五十九人俘男女數百毆畜產千計阿資窘蹙與
其母出降其冬入朝上宴之奉天殿賜黃白二金若
鈔綺甚厚造第鳳陽尋遣還鎮二十三年英使臨安
衛指揮王執討平教化三部之不賦者又使貴州都
指揮張泰討普安酋密卽之亂二十四年復征阿資
叛詔平羌將軍何福領西平侯兵而令西平侯還鎮

阿資亦旋降初英留鎮之明年孝慈皇后崩英三日不入口哭幾絕及二十五年哭懿文太子益悲上賜之黃封而遂卒年四十八贈黔寧王諡昭靖侑享太廟還塋都門外雲南父老蠻夷酋長莫不流涕請立廟制曰可英子四人春晟昂昕尚成祖長寧公主春年十七從父征討有功平定江西山寇先登授驃騎將軍都督府僉事從征虜將軍馮勝出沙漠二十五年嗣父侯鎮雲南平緬東川維摩阿的越窩賈哈刺施甸蒲阿董越蠻阿資廣南酋儂真枯順寧酋猛丘寧遠酋刁拜爛麓川酋刁干孟永寧卜八如加授

征虜前將軍年三十六卒建文君諡之惠襄無子晟
嗣晟少疑重端慤讀書敏記高皇帝甚重之弱冠授
後軍都督僉事亡何進左都督既嗣侯卽代爲雲南
大帥時岷王之國雲南與晟交惡成祖召晟至京師
面飭之貽王書此其父佐命開疆之臣麓川宣慰使
不能制下爲諸蠻所逐晟討平之分其地爲孟養木
邦孟密三府鎮沅威遠二州干崖潞江清甸大候者
樂五長官司置騰衝千戶所潞江西以控之八百國
之長使其獷帥以蠻衆來犯晟發兵使別將逆擊之
自倚其後至蒙自蠻退走追之獲其帥賜璽侑金幣

成祖四年征安南使晟爲征夷左副將軍率雲南諸
衛所土漢兵以行棧繇蒙自經野蒲斬木通道入奔
猛烈棚華關隘造舟濟師分遣所部據灣沔寺沙舁
舟夜出洮水步騎夾之遂渡富良江與征夷將軍新
城侯輔兵合破多邦城柵擣其東西二都及盤灘収
檣江仙侶等賊悉蕩平之與新城侯追擒胡奎於日
南州奇羅海口入朝論功封黔國公賜宴御製詩褒
美之再宴便殿還鎮雲南繼與英國公擒捕安南餘
孽簡定季擴等送京師尋撫降富州叛酋仁宗卽位
召還宴勞賜金幣加太傅還鎮宣英嗣位賞如之麓

川思任發反晟與都督沐昂方政往征敗績政死賊
中晟還至楚雄卒追封定遠王諡忠敬滇人攝服晟
父子威信莊之若主上每片紙下土酋土酋稱令旨
具威儀郊迎盟而後入啓之歲時奉獻不絕晟父子
前後置圃墅田業三百六十曰吾日食其一可以周
歲珍寶金貝充牣庫藏後庭曳羅綺役使閹奴可數
十百人而善事中貴通遣執政不絕晟之卒也子斌
幼嗣公不能將其軍昂以都督同知佩印代鎮復討
麓川不利定西伯蔣貴等兵與合始平之昂得遷爲
左都督賜金幣加等卒贈定邊伯諡武襄斌嗣斌討

徵夷才以武嗣十一年薨贈太傅謚榮康子琮幼不克嗣昂孫璘以才舉爲右都督代鎮卒璘弟瓚爲都督同知復代鎮前後凡十五年而琮始嗣公又明年始佩征南將軍印爲鎮守嘗捕獲叛酋尋甸守安倘廣西守昂前後平馬隆麗江劔川順寧羅雄等蠻臨安之昌明鐵箐赤石崕羅羅大發兵討獲賊帥師五等累賜勅褒獎加太子太傅嗣公凡三十二年而卒謚武僖琮無子以瓚孫都指揮誠之子崑嗣朝議謂黔國公得自晟崑宜侯不得爲公雲南守臣言南人知有黔國公也侯之恐爲所輕崑十四歲而拜公

爵尋以征南將軍填守發兵平龜山竹箐蠻諭定孟養孟密之爭寨者又合川貴二鎮兵平米魯亂再擒師宗州賊張良受南安亂會那代三賜璽書再益歲祿百石加太子太傳崑能詩嗣公二十四年卒贈太師諡莊襄子紹勲嗣十六年而卒諡敏靖子朝輔好學有文嗣十一年而卒父子皆加太子太傳贈太傅二子融輩皆甫襲殤朝輔弟朝弼當嗣虐其嫂且錮之不使還南京相訐奏久之始得襲其淫惡益甚詔削爵移爵其子昌祚朝弼復欲殺昌祚逮至京錮于南京之故第竟死沐氏久鎮雲南擬於親王督撫大

臣謂沐氏皆及門下車藩臬以下逡逡爲讓天下久
平縉紳士抑眨之萬曆中昌祚出僉事楊寅秋不避
道昌祚笞其下人寅秋與昌祚訟於朝中朝之士不
能無多求沐氏明旨屢切責云沐氏鎮雲南其卒也
皆還葬都門之外所以得用閹其始鎮太祖使閹監
焉陵夷用閹人

郎曰岐陽黔寧高帝肺腑岐陽好文今其子孫皆文
予嘗見岐陽像髭鬚之外口四角復有微鬚人言黔
寧高帝外婦子也帝長黔寧十七歲時方貧困外遇
婦人豈其然歟

廖永安

俞通海俞通源俞通淵合傳

張德勝

桑世傑

胡大海耿再成合傳

趙德勝

廖永安高帝水將也其先家黃州後徙巢父旺從高祖渡江子五人永清永寧永堅永安永忠元亂彭祖倡妖江淮間永安與永堅爲其萬戶元殺彭祖永堅往仕漢永安則與其弟永忠縣人雙刀趙俞廷玉王子通海趙伯仲伯仲弟庸合肥人張德勝葉昇無爲人桑世傑舍人華高以戰船千餘結水軍屯巢湖扞盜廬人左君弼者亦故爲彭祖將以書招永安永安

等不從君弼率兵攻永安永安數不勝乃使韓成持
書見高帝和陽願以舟歸時高帝久駐和陽衆已數
萬謀東渡江政不得舟得永安等書顧李善長大喜
曰此天意自率兵至巢湖爲永安援時桐城閘馬場
河等隘口皆爲元中丞蠻子海牙水寨所扼僅一支
港可以出舟又淺澗會天久雨港漲高帝舟差大過
橋洞爭一米舟皆出諸將大悅及黃墩雙刀趙有反
志永忠與俞通海張德勝密告高帝高帝以免旣歸
和陽使永安與德勝通海將水軍攻蠻子海牙于峪
谿永安與通海德勝操舟若使風大破之是時永安

矢傷鼻入江再與通海德勝攻海牙青沙坊獲闢船
十五從還和與通海德勝破鱗魚洲鐵長官新生沙
二寨獲人馬還從渡江連與元戰奪元塢寨十餘官
軍總管再從常遇春攻蠻子海牙於黃墩遇春分兵
疑元用正兵與戰鄧愈中搗以奇兵載蜉蝣二艘脂
蒭納砲順風縱火大敗海牙軍是時永安生擒其首
目三十八人俘獲萬計與馮國用攻破陳兆先從克
集慶官永安昭武大將軍統軍元帥從徐達轉攻常
取宜乘夜擊走張士誠兵瓜埠士誠誘新附青軍攻
達常州永安與達內外夾擊大破之官同僉江南行

樞密院事與常遇春自銅陵攻徐壽輝池州去城十里而軍破其北門克之與俞通海桑世傑攻江陰僞吳水將定世傑死於軍永安怒與通海急擊之獲定降其帥瑞官同知樞密院事與士誠兵戰福山港大敗之又破之通州狼山獲其艦與徐達邵榮復宜興乘勝擊士誠將呂珍太湖舟膠不利永安麾兵皆退獨身當珍見獲士誠拘囚之不屈高帝嘉之遙授光祿大夫柱國江淮等處行中書省平章政事封楚國公而封旺爲涼國公永安拘吳中八年竟死僞吳平乃還喪高帝迎祭於郊高帝開天之將七人焉廖永

安俞通海張德勝桑世傑胡大海耿再成趙德勝也
洪武六年七人者已先後物故旣祭功臣廟復配享
太廟下禮部定諡號禮部臣議曰有元失馭四海凜
沸英傑之士或率義旅或障一方泯泯紛紛莫知所
屬真主奮興不期自至龍行而雲虎嘯而風若楚國
廖永安等七人者皆熊羆之士膂力之臣或陷敵歿
陣或遭變捐軀義與忠俱身先業隕陛下混一天下
追功隆封爵祿及子孫享祀配廟庭秩報已崇易名
非誇臣謹以赴敵逢難諡永安曰武閔殺身光戎諡
通海曰忠烈奉上致果諡德勝曰忠毅折衝禦侮威

而不猛諡大海曰武莊關土斤境武而不遂諡再成
曰武壯折衝禦侮壯而有力諡趙德勝曰武桓桑世
傑業封永義侯與漢光武封冠恂景丹同即可爲諡
上可其奏八年皆加贈開國輔運推誠宣力武臣光
祿大夫柱國同知大都督府事十三年改封永安郎
國公永安亡子以永清子昇爲指揮僉事永忠自有
記

俞通海其先濠人父廷玉耕於巢之野子三人通海
通源通淵也彭祖爲羣盜廷玉與三子從其部李晉
勝軍晉勝敗廷玉率三子與其縣人廖永忠等結船

巢湖數與左君弼戰不勝而歸船於太祖黃墩之戰
通海關尤力廷玉通海爵萬戶從渡江拔采石取太
平廷玉有謀廷玉通海爵軍總管攻取邊湖水陽涇
縣溧陽固城湖太平河三汊口廷玉通海通源皆有
功已通海與蠻子中丞戰獲一船賊帥二十餘人已
火元中丞軍於水陸取陳兆先定臺城及鎮江諸縣
廷玉通海通源皆有功廷玉遷元帥通海遷秦淮統
軍元帥尋遷行樞密院判官已克江陰州宜興宣城
寧國廷玉通海通源皆有功已通海與樞密判趙賊
等趨水陽下句容克大浦口以舟師入太湖馬跡山

降其二將與吳將珍戰施口以甲蒙士爲俞將軍自
入行間與士卒襍戰還克吳江與吳兵遇血戰中矢
歟已廷玉援池樅陽通海與廖永安攻降僞吳將江
陰樂瑞擒其水將定於石碑取通克太湖宜興戰敗
吳獲風快船三銃首四十餘人已漢將趙晉勝陷池
據樅陽通海從廷玉擊其柵江營追殺甚衆獲巨艦
數百進復池廷玉通海皆遷僉樞密院事通海還攻
晉勝於安慶獲漢黃旗斗船俘其帥而廷玉戰死已
通海戰漢友諒於龍江走之追火其舟慈湖獲其七
帥又追之於采石矢中臂論功第一遷樞密院同知

從征漢取銅陵安慶江斬黃武昌復南昌通海通
亦俱有功已與漢戰鄱陽舟小漢巨艦壓舟通海軍
口抵艦以脫鐵盔皆裂遂火漢舟二十與廖永忠以
不不綱追漢將定邊以六舟深入廬戰進軍罌子口據
漢上流友諒死還論功太祖賜通海良田金幣已從
攻武昌遷中書省平章政事守禦廬峻壘深塹招戢
逃者廬人以寧已從徐達征浙西克湖州拔舊館分
兵取太倉太倉民持羊酒迎降僞吳帥仁等率數千
人將以百餘舟入海旣聞秋毫不犯皆羅拜爲編氓
無收山崇明嘉定松江已與吳士誠戰滅渡橋敗

之提兵桃花塢蕩其營而通海中流矢死通源領其
兵助攻吳擒之通源襲兄任爲江淮行省平章政事
從大將軍徐達取中原克平山東河南燕冀秦晉大
破王保保兵定西攻克興元封南安侯已從征沙漠
甘肅鎮守雲南征勦南荒蠻夷皆有功通淵從西平
侯征貴州封越巂侯尋以罪削爵文皇帝師至白溝
越巂侯死初太祖爲吳王時贈廷玉樞密院同知追
封河間郡公通海之中矢耿也太祖爲之所及中流
矢歸車駕臨問通海不能對太祖揮淚出其卒也臨
哭之哀從官衛士莫不感涕贈光祿大夫追封豫國

公已改封虢國公諡忠烈通海沉機簡重勞不矜能
嚴而有惠卒無子通源追坐胡惟庸黨子不嗣通淵
子亦天死爵皆絕俞氏父子四人死王事者三也

張德勝合肥人與俞通海以巢湖水軍來歸從渡江
與湯和擊破瑩先水軍又大破瑩先子兆先於方山
擒之與俞通海大破漢將曾勝於柵江營與徐達追
斬漢將泰於潛山從高帝以水陸大軍禦漢友諒龍
江從中大呼奮擊大破之與徐達馮勝追及采石力
戰死年三十三德勝累功樞密院僉事至是追封蔡
國公已與永安等並加贈諡德勝死時子宣幼帝使

其養子汪同蒙德勝姓襲其職名之興祖興祖數從大將軍取漢伐吳平定中原以功自拜都督同知賜還故姓既命鎮守大同兼晉王傅人告興祖罪使從傅友德伐蜀自贖戰死文州追封東勝侯宣拜神策衛指揮同知征散毛洞有功其後以軍務之雲南坐失彩段謫戍金齒卒孫輩有戰功

桑世傑無爲人少慷慨有大志與廖永安歸太祖和陽從攻破采石新生沙砦及鱗魚洲鐵長官水砦從渡江克采石取太平從擊陳瑊先水砦與徐達會北門敗之生擒瑊先與廖永安俞通海以舟師大破蠻

于海牙於采石從攻破陳兆先於方山擒之克金陵
拔鎮江有預功陞秦淮翼元帥下金壇丹陽從圍常
州從攻寧國長鎗諸軍與通海及樞判趙馘攻克水
陽常州平陞州判行樞密院事與徐達常遇春取馬
駙沙克大浦口攻下江陰太湖宜興與通海永安攻
張上誠江陰石碑海寇其帥藥瑞率僞州判錠等方
整兵待戰世傑躍馬陷陣死之追封永義侯子敬封
徽先伯

胡大海字通甫泗虹人耿再成字德甫泗五河人也
再成從高帝克泗蕩滁大海杖策自滁謁帝一見語

合爲前鋒高帝克和渡江恢拓江左二人者皆善疾
力戰丁酉歲宣州降復叛大海與丁德興攻破復之
而與鄧愈自績溪進攻徽擊敗元將八思爾不花追
其萬戶訥於遂安元苗帥楊完者以兵十萬來救大
海前諸軍斬其部將才戊戌歲克嚴大敗遂安守將
洪與李文忠擊敗楊完者攻徽舟師擒其將旺及升
降其苗帥員成蔣英劉震李福李佑之賀仁德與李
文忠取諸暨火九華山鮑萬戶寨遷行樞密院判官
大海說鄧愈曰蘭谿者婺州右臂於嚴爲近公引兵
下之婺我有矣愈從大海言攻下蘭谿進攻婺婺不

下帝乃自往征則以再成爲前鋒大海見帝客王宗
顯帝曰客何自來曰烏江人帝喜客者吾鄉人使偵
嫫還報曰嫫將貳可下也帝曰有之守汝元將果貳
開東門以納師帝守宗顯陞大海僉書行樞密院事
使規取徽衢處紹興而以王愷爲大海都事民賦軍
器咸屬復使再成爲行樞密院判官領兵西屯縉雲
其明年再成與大海出軍樊嶺攻走處守將石抹宜
孫石抹宜孫復來收其殘卒殺慶元令曾封再成復
擊敗之石抹宜孫死竹口其又明年漢友諒寇龍江
帝命大海擣其信州牽制之大海遣裨將俊往王愷

自衢馳告曰信州漢門戶也漢人傾國入寇守信重
兵亡疑主公固命公擣其信州牽制之公大將也不
自出軍以屬人卽師之郟奈吾衢處何大海驚起拜
愷因自往戰靈溪敗之帝使大海子德濟守信又明
年召大海還爲中書分省叅知政事鎮婺如故陞愷
左司郎中大海鎮婺威讐化孚掖顛摩疾婺人大寧
初苗帥蔣英劉震李福李佑之賀仁德之降也李文
忠實受之因以英震屬婺佑之仁德屬處大海置英
震麾下甚愛之英震與佑之有異志約日謀爲亂諸
苗軍皆不忍曰胡叅政待我素恩李福曰胡公信恩

不殺主將則事不成因置酒八詠樓請大海觀弩方
出門上馬蔣英袖鐵槌擊殺大海提大海首馬上併
殺其子關住而愷與總管高子玉皆遇害壬寅春二
月七日也其日佑之仁德亦殺分省都事炎於處再
成聞變政飯客府中從席上提劍上馬迎罵曰俘虜
奴何負汝汝反鈍吾劍耶佑之仁德前刺再成墜馬
遂與元帥朱文綱知府王道同死之事聞贈大海光
祿大夫浙東等處行中書省平章政事柱國追封越
國公配享晉下壺廟再成追封高陽郡公亦廟祀之
愷贈奉直大夫飛騎都尉追封當塗縣男炎丹陽縣

男李文忠下杭蔣英獲伏誅高帝使懸大海像市中
刺英血以祭也洪武元年大海再成並祭雞籠山愷
炎及李夢庚祔既配享太廟並賜諡已與廖永安等
並加贈改封再成泗國公大海子德濟及再成子天
璧皆爲都指揮有戰功大海長身鐵面兩目煜煜軍
中夜望若夾燈然既卒諸軍若夢大海坐胡床指揮
若夜見火光滿野洶洶若人馬聲則輒大捷生嘗語
人曰大海武人不曉讀書惟是三知以行六軍知不
殺人知不火舍知不畧婦女再成行軍有節制軍出
無犯人畦蔬者其守處也勞來安輯招伏剪渠處以

忘戰王愷當塗人常將軍帳下將擾市愷執扶之將
歸泣言常將軍將軍怒召愷譙讓愷曰公主上股肱
也而帳下將擾民愷執扶之公宜以爲喜誠不意公
之怒也夫民者國本紛爭之時朝向暮背公宜思之
炎者孫炎句容人跛而辨詩酒自好盡交當世豪傑
劉基章溢皆所辟舉基與言自謂不如也炎守處徒
手無兵直以口舌安反側旁郡處之變也佑之屬卒
囚炎炎給卒我且降佑之知炎高持許當無意饋斗
酒燂鴈與訣炎披帝所賜紫綺裘拔劒割鴈大酌狼
罵死李夢庚故爲高帝掌軍簿書使守諸暨諸暨將

再興以泄軍懼誅殺之以諸暨降張士誠德濟乃從李文忠復焉與胡深去諸暨六十里城新城帝悅使守之洪武初德濟從大將軍西征莊浪失利大將軍誅他將而歸德濟天子天子曰德濟守信州復諸暨城新城有前功得蒙赫

趙德勝濠人魁梧多力善運槊馬上年二十八爲元義兵長每戰操短兵前驅無旌之者西謁元歸德王忙哥太祖興於滁德勝母在太祖軍中乃棄其妻去忙哥來歸太祖喜賜是名爲帳前先鋒從取鐵佛岡攻三汊河破張家寨克全椒收六合與太祖共完瓦

梁壘矢中股搗烏下和平舍取儀夜襲陳也先管校
忠勇校尉軍先鋒從渡江有金陵德勝功多先與徐
達取鎮江下丹陽金壇宣城有分功轉承信校尉軍
先鋒取廣德毘陵復廣德宣城取江陰吳興有分功
擢懷遠大將軍中翼左前元帥攻池州取青陽石埭
無爲潛山與漢戰擒漢將及部卒四百漢友諒下龍
關德勝戍虎口爲前關與馮勝征高郵有分功陞後
翼統兵元帥從克九江攻黃梅廣濟克瑞福臨江吉
安諸州還下安慶進克撫從征彭蠡湖取淦漢降將
祝宗康泰叛南昌殺守琛從徐達攻復其城扃夷於

礪超授行樞密院僉事與都督文正叅政鄧愈共守之從常遇春平羅友仁於池攻破漢殘將八陣指揮於西山俘獲三千餘人臨江吉撫服復叛皆平之久之漢空國來爲南昌圍德勝開城門以千人逆戰手射漢指揮退其兵友諒親圍南昌八旬有五晝夜攻擊無不殫也德勝嚮應見奇無不設也漢圯我城德勝戰且城出行城中蹶張宮步門沒入腰六寸死漢亡贈德勝榮祿大夫江西行中書省平章政事柱國追封梁國公而先後死漢者十三人各贈有差爲忠臣廟於豫章祀之以德勝爲首十三人者右副指

揮使劉齊統軍元帥許圭右翼元帥朱潛戰吉安死
左翼元帥副使牛海龍突圍中矢死樞密判官李繼
先急戰擄死右副元帥趙國昭燒漢艦追者至投橋
死洪都知府葉琛江西行省都事葉思成死於宗泰
者也臨江府同知趙天麟城陷死百戶徐明見誘戰
墮阱被獲不降死千戶張子明代父行間紿漢死千
戶張德山總管夏茂成銳鬪死天下既定肖德勝像
功臣廟配享太廟賜諡武桓八年與廖永忠等並加
贈德勝剛直沉鷺馭下嚴肅軍中一號一今旗幟爲
之改觀以能多捷奏德勝未嘗讀書機智如神闇合

古名將平居篤孝友如脩士子獻指揮同知世襲德勝弟端亦從軍屢傷身端子麟捕倭有功麟孫輔以征蠻功封武靖侯

郎曰臣子之功君父所明從渡江之臣多矣獨廖俞張桑胡耿趙七臣者高帝所首旌以享太廟抑天下將定竹破席卷易爲力惟夫豪傑全紛從戈戟矛矢中求成事蓋論將草昧之初難哉難哉